

*A Jean de la Courtoisie a son amiti — lequel y ma donné
le 15. de Mars. 1667.*

P R I V I L E G E D V R O Y.

LAR ample & special priuilege du Roy, donné à Maistre
laques Besson, auteur de ce present œuure, pour dix
ans prochainement venans, commencans du iour que
l'œuure sera acheué d'imprimer: defenses sont faictes à
toutes personnes, de quelque qualité ou condition qu'ils soyent, de
ne faire, contrefaire, grauer, vendre, ni à ce consentir, tant à la pein-
ture qu'en la fabrique d'aucunes des inuētions contenues en ce pre-
sent œuure, sans la permission dudit auteur: sur les peines conte-
nues & specifiees audit priuilege, dōné à Orleans, l'an mil cinq cens
soixante neuf, le vingtseptieme iour de Iuin.

Par le Roy, en son conseil.

S I G N E B R U L L A R T.



A MONSIEVR FRANCOIS d'Hastings, &c.



Onsieur, outre ce que ma petitesse peut me redarguer, voire conuaincre d'une hardiesse demesuree en ce que i'entrepren de mesler vostre illustre nom parmi aucune chose venue de moy, ce titre attribué aux ouuriers de ce qui est descrit en ce liure, en les appelant mechaniques, descrie tellement l'ouurage, qu'il semble que vous en tenir seulement propos, soit vne lourde faute, & du tout inexcusable. Mais pour respondre en premier lieu à ce dernier poinct, ceux qui scauent que vaut ce mot de Mechanique en la lague Greque, dont il a esté tiré, (& ne signifie autre chose qu'un inuêteur ou ouurier d'ébins & machines desquelles l'usage s'estend en tout ce qui est requis en la vie presente, soit pour la necessité, soit pour l'ornement & hōneste recreation, soit en temps de guerre, ou de paix) iugeront de ceste tant excellente science (ie dis science vraiment demonstratiue) non pas selon que porte l'abus du commun, mais selon la verité. Et pourtant m'accorderont que puis qu'entre les arts qui gisent en pratique, il n'y en a pas vne ni plus recreatiue pour la gentillesse des inuentions, ni plus vtile, voire plus necessaire en infinies occasiōs, & en toute maniere de viure: à grād' peine aussi s'en trouuera-il aucune plus digne d'estre cognue & pratiquee par l'aide des grands, ordonnez de Dieu pour aider & soulager les petis. Ceci se pourroit beaucoup amplifier & demonstrier par tres-grādes & inuincibles raisons, mais ie me cōtenteray d'en dire vne pour toutes: ascauoir que si la contēplation des proportions des nombres, poincts, & mesures es choses artificielles, est inutile si elle n'est rapportee à l'actiō, il s'ensuit que la mechanique est le fruiet de la geometrie, & par consequent, le but d'icelle. Aussi tant s'en est salu que les grands Empereurs & Roys l'ayent mesprisee, qu'au contraire plusieurs d'iceux en ont esté amateurs, iusques à la practiquer eux mesmes,

par maniere de dire, non feulemēt de l'esprit pour en cōprēdre les raifōs, mais aussi des mains mesmes, autāt que leur grādeur le pouuoit souffrir. tesmoins entr'autres ce grād roy de Syracuse, Hieron: Demetrius, roy d'Asie: & Adrian, l'vn des plus illustres empereurs Romains. outre ce que tous ces grands seigneurs anciens pour la plus-part n'ont pas moins perpētue leur mēmoire par le moyē des cifeaux des ouuriers dont nous admirōs aujourd'huy les ouurages ruinez, que par les liures des doctes & bien difans historiens. Et quant à ce qu'estant si petit, j'ose m'adresser à vous, Monsieur, deux choses me garentiront de ceste faute: ascauoir vostre humain & gracieux naturel, & l'excellence de celuy duquel ie vous presente vn ouurage auquel ie m'asseure, (selon que j'ay cognu vostre vrayement noble & gentil esprit encliné à telles estudes) que ne prendrez moins de plaisir pour la subtilité & commodité des inuentions ici contenues, que plusieurs en pourront tirer proufit, les mettant en pratique. Cependant, afin que quelqu'vn ne pense que ie face mes monstres, & me pare des plumes d'autrui, ie vous presente avec les figures des machines qui sont de l'auteur, la declaration d'icelles, sans laquelle elles seroyent à la verité comme vn corps sans ame, à l'endroit de plusieurs. Que si Dieu eust faict ceste grace à l'auteur du liure de luy donner plus longue vie, il ne faut douter que l'œuure ne fust sorti de sa main beaucoup mieux poli & accompli en toutes ses parties. Si est-ce que j'ay esperance que ma peine en cest endroit ne sera iugee par gens à ce cognoissans, ni petite ni vaine: vous suppliant treshumblement, Monsieur, de prendre en gré ce mien petit labeur, & souffrir que vostre illustre nom luy serue de frontispice, comme d'vne tresheureuse rencontre pour le faire trouuer meilleur à toutes gens equitables, & le preseruer des calomnies de tous enuieux. De Basle, ce premier d'Octobre, 1578.


VOSTRE SERVITEUR TOUTE SA VIE,
FRANCOIS BEROALD.





AVDICT SIEVR D'HASTINGS, &c.

SONET.



I N S I qu'un bastiment dont la teste leuee
Se pousse vers le ciel, est honore d'avoir
Un marbre sur son front qui belle face voir,
Avant qu'on soit dedans, sa glorieuse entree:
Celiure(dont le trait non seulement recree
Celuy qui l'apperçoit, mais aussi a pouvoir
Par sa diversite & grandeur d'esmouvoir)
Se plaist de vostre nom dont sa face est paree.
Et si vous permettez que vostre nom l'honore,
Sur le temps qui nous fait, & qui puis nous deuore,
Ayant fait vostre cours, il vous fera vainqueur:

*Ainsi comme Hieron & le grand Demetrie,
Qui honorans ces arts en Sicile & Asie,
Recoyuent aujourdhuy par eux vie & honneur.*

FRANCOIS BEROALD.

MUSA FOELICITAS ALTERA.

A LUY MESME.

M O N seigneur, cil qui void les engins de *B E S S O N*,
Ne pouuant pas sonder la science secrette
De cest art tant subtil, *B E S S O N* mesme il regrette,
Pour de tels instrumens luy faire vne lecon.

Mais puis que *B E R O A L D* a trouue la facon
D'expliquer ces engins, il n'y a point de perte
En la mort de *B E S S O N*, sa vie est recouuerte:
B E R O A L D maintenant nous met hors de soupçon.

De si vives raisons ces pourtraicts il explique
Par l'art industrieux de sa Mathematique,
Que de tous ses engins on comprend les effects.

Puis il a son labeur sacre a vostre gloire,
Digne entre les Francois de l'heureuse memoire
Que merite l'effect de ces rares pourtraicts.

HEUR DE LABEUR.

LE DIGNE.

A. ij.



P R E F A C E A V

L E C T E U R .



AQVES Besson, Dauphinois, Ingenieux & Mathematicien du Roy de Frãce, mesprisã plusieurs incõmoditez, s'exposã à beaucoup de dãgers, fit des voyages fascheux, & en diuers pays, employa toute sa vie, & trauailla en toutes sortes pour puiser des sources pl^e cachees des Mathematiques & arts mechaniques, diuers secrets grãdemẽt necessaires à toutes republicues, & suffisans pour cõteter les estudes des plus gẽtils esprits. S'il eust voulu fuir le trauail, & des sa ieunesse s'emparer de l'autoritẽ des anciens pour regratter leurs conceptions, & se faire valoir par tel moyẽ, iamais il n'eust atteint à ceste cognoissãce des choses difficiles, de laquelle il a faict professiõ au grãd proufit de tous. Or entre les œuures excellentes de ce personnage de grãd & ingenieux esprit, & ou lon peut voir de l'artifice admirable, voici vn Theatre de labeur immẽse, rẽpli de machines & d'instrumẽs plaisans à cõsiderer, & tref-vtiles à practiquer. Il esperoit bien, en faueur des gẽs de lettres, adiouster plusieurs autres tables à ce liure, avec vne explicatiõ de tout le cõtenu, pour enseigner ceux qui ne sont pas des plus exercez en telles choses: mais d'autãt que la souuenãce des trauaux passez, & la difficultẽ de ceux qui se presentoyent, destournoyent de son entreprise ce personnage, souuentefois reduit à vne condition & maniere de viure fort incertaine: craignant aussi qu'en voulant presenter vn ouurage entierement elabourẽ & fourni de toutes ses parties, la mort le preuinist, & que ceste meilleure part perist avec luy, ayant trouuẽ à propos des pourtrayeurs & graueurs excellens, il fit tailler en cuiure les soixante tables que nous vous offrons maintenant. Et comme il estoit apres à expliquer ce grand Theatre, auquel il vouloit adiouster quelques nouuelles inuentions & pieces non moins excellentes (asçauoir trois liures: le premier desquels traittoit de l'inuention des moyennes & continuellement proportionelles: le second, des elemens de conuertir le courbe en droites dimẽsions: & le troisiẽme, des exercitations tant du premier que du second. le tout inuentẽ de tel esprit, que les plus doctes Mathematiciens certifioyent n'y auoir eu iamais inuentions Mathematiques plus proufitables:) la mort l'ẽporta du monde, & osta la vie à celuy qui viuoit pour seruir aux autres. Or en laissant deplorer telle perte aux hommes studieux, nous desirons que chacun recueille le cecy de bonne affection. Cependant nous voulons bien que chacun sçache qu'il n'y a ici aucun instrument ni machine pourtraite, qui n'ait estẽ ou inuentee ou enrichie par Besson (combien que plusieurs ayent tirẽ quelque chose de ses discours familiers, n'ayant eu honte de monstrier çã & là quelques semblables inuentions) & qui ne soit ferme & munie de toutes pars de raisons pregnantes & necessaires, tirees des Mathematiques & de la Physique. tellement que lon peut dire sans vanterie que ce n'est point ici l'ouurage d'un homme oyseux & delicat, ou nourri à l'ombre: mais d'un qui a souffert beaucoup, & a consommẽ de grands biens. Brief, cest œuure ornẽ de tant de belles machines est tel, qu'il faut dire que celuy qui n'y prendra contentement, est malade d'ingratitude & d'enuie, mesmement s'il ne sçait ni ne peut faire mieux. Au reste, afin que tu puisses tirer autant de proufit que de plaisir de ces machines, ie les ay declarees suyuant les raisons sur lesquelles s'estoit fondẽ Besson, comme tu pourras voir par la lecture de ceste declaratiõ: pour laquelle mieux entendre, tu noteras ceci en toutes les figures, (soit qu'elles soyent disposees d'une façõ ou d'autre,) que la teste du liure est nommee Septentrion, la ligne du bord de la plãche estãt pour ceste cause appelee la ligne Septentrionale: le bas, Midi: le bord de la planche tournẽ vers ce quartier, la ligne Meridionale: la cousture, Occident, & le bord qui la regarde, la ligne Occidentale: l'opposee, Oriẽt, & la ligne, Orientale. Outreplus, pourautãt qu'il n'y a point de lettres es planches qui seruent à demõstrer, afin que ie te meine au lieu que i'entendray, i'vseray souuẽt d'une mesure diuisee en vingt-et-quatre parties, laquelle avec tout le reste est mise en la prochaine page, à laquelle tu pourras auoir recours. Bien te soit.


Angle de Septentrion
& d'Occident.

Ligne Septentrionale.

Angle d'Orient & de
Septentrion.

Ligne Orientale.

Ligne Occidentale.



Angle d'Occident
& de Midi.

Ligne Méridionale.

Angle d'Orient
& de Midi.



A V X A M A T E V R S
de ces sciences,

O D E.



UE sert-il estant en vie
De secher deffous l'enuie,
Qui en nous minant le cœur,
Et faisant forcer nature
Nous contraint avecques cure

De chercher ici honneur?
Ou soit par quelque vaillance,
Quelque labeur, ou science:
Ou en suyuant le destin,
Qui nous tenant compagnie
Jusqu'à l'heure definie
Void avec nous nostre fin?

Si la dent impitoyable
Du faucheur d'ans imployable
Nous fait sentir son effort,
Et à peu nos iours moissonne,
Sans qu'aux doctes il pardonne,
Les mettant mesmes à mort
Abusant leur esperance,
Qui leur donnoit patience
A souffrir plusieurs ennuis:
Desirans de voir vne heure
Muer en vne meilleure
Cent & cent fascheuses nuicts.

Que pour la future race
Induire à suyuere leur trace,
Et acquerir du sçavoir,
Non pour d'une vaine gloire
Eterniser leur memoire,
Et des gens se faire voir.

Car la vanité tresuaine
Est celle qui se proumeine
Dans l'humain entendement,
Et qui pousse par sa flame
Veut faire viure son ame
En terre eternellement.

Ou avec leur industrie
Faire bien à leur patrie,
Comme faisoit nostre auteur,
Qui suant sous son aleine
N'esparгна iamais sa peine,
Tant qu'es os il eut vigueur.
Donques d'un œil debonnaire
Vueillez de cœur accueil faire
A ce Theatre diuin:

Et que chacun y proufite,
Ou qu'apart-soy on s'incite
D'y mettre à mieux mieux la main.

Quant à moy ie veux poursuyure,
(Si Dieu me laisse tant viure)
De faire vn iour voir comment
Il m'incite le courage
Pour paracheuer mon aage
A l'imiter seulement.
Ce que faisant ie desire
Que ceux qui me viendront lire
Soyent tant sur moy enuieux,
Qu'au regard de mon ouurage
Ils soyent espris d'auantage,
Et ascheuent à faire mieux.

M U S A F O E L I C I T A S A L T E R A.

Ce liure ne veut point, d'un langage mignard
Pour parer sa beauté, l'attrayante eloquence.
Car il veut seulement, qu'on monstre la science
Par mots assez communs aux raisons de son art.



DECLARATION DES parties & vſage de ce THEATRE.

PROPOSITION PREMIERE.

Certains instrumens inuentez par raison geometrique & mecha-
nique, pour les mesures & fondemens desquels pour la plus-part se ser-
uent les inuentions ſuyuantes en ceſt œuure.

DECLARATION DE LA I. FIGVRE.



N CESTE premiere figure l'auteur nous preſente les instrumens les plus ne-
cessaires en mechanique, & dont il vſe ſouuent es ſuyuantes machines: a ſcauoir
le cōpas & la reigle, qui ſont du coſté d'orient. & a faiet ainſi ſon cōpas, afin qu'au
beſoin il puiſſe ſeruir de meſure, de reigle, & d'eſquerre, eſtant ceneantmoins tous-
iours compas: & doit auoir de longueur (encor qu'elle ne ſoit pas ici obſeruee) ou
un pied, ou demi, ou huit poulces, ou quelque autre certaine, d'ot on ſe puiſſe ai-
der au beſoin. D'auantage il-y-a au milieu la vis & l'eſcroue, & vers occidet les
instrumens dont on les fait. & doivent eſtre conſidereꝝ ceux du milieu: car il en be-
ſongne ſouuent es machines ſuyuantes: ou il ſe faut aider de la vis comme es en-
gins à leuer & à tirer ſardeaux, & eſt l'vſage fort & vtile. car (comme il ſera dict
ci apres) iamaſ la vis ne retourne: & a vne force incroyable. ce que monſtre aſſeꝝ l'vſage quotidian. Et ceci eſt tout ce
qui ſe doit conſiderer ſur la premiere figure.

PROPOSITION II.

Inſtrument nouveau & ſingulier, pour meſurer toutes les parties no-
tables de tout corps propoſé pour ſcauoir le rapport proportionel
d'icelles en la compoſition d'iceluy.

DECLARATION DE LA II. FIGVRE.

Ceſt inſtrument eſt fort vtile à ceux qui veulent prendre les meſures d'un corps, afin puis apres d'en faire un
tout ſemblable: d'autant qu'il peut conſtituer les deux iambes d'un triangle, ayant tel angle & telle proportion en-
tr'elles qu'on accordera. Ce qui ſe pourra bien entendre par la declaration de ſes parties, qui ſont telles. Premieremēt
il-y-a deux branches, dont celle qui ſe monſtre deſſus, & où apparoiſt un cercle diuiſé en 16, qui eſt la teſte du clou,
tend de l'angle d'occident & de midi à l'angle de ſeptentrion & orient: & l'autre qui luy eſt du tout pareille, hors-
mis qu'elle ne recoit pas la teſte du clou, tire de midi en ſeptentrion: eſtant l'une & l'autre diuiſee en 15 parties, cha-
que partie l'eſtant derechef en cinq: de ſorte qu'il-y-a 75 parties en tout: ſe pouuant toutesfois le dict inſtrument fai-

B. i.

Declaration

re de grandeur volontaire, selon la commodité de celuy qui le veut. Outreplus les regles ou branches, sont, quant à leurs corps, quarrées, plattes, & de telle espaisseur qu'on puisse tout de leur long faire vne renure à queue d'hironde, où puisse entrer vne coulisse ou nauette qui y soit bien adioustee: & qu'ainsi il-y-ait deux renures & deux coulisses, au milieu desquelles on face deux autres renures au trauers des regles, lesquelles deux soyent plus courtes & plus estroittes, ne finissant pas aux bouts des regles: car elles les fendroyent. Mais afin qu'on entende l'usage de la place de ces renures, il est besoin de scauoir quelles sont les autres parties de l'instrument, a scauoir les deux nauettes & le clou, avec ce qui luy faut, tout estant compris en ces cinq figures qui sont en occident. La premiere desquelles, en comptant de midi en septentrion, est l'alhidade, ou regle demonstrante, dictée par les Latins *Ostesor*: la seconde est la teste du clou, sur laquelle tourne ceste alhidade, ayant en son bord les poinçts de l'eschelle altimetre, qui y sont rapportez: la troisieme est vne des nauettes, ayant vn trou rond au milieu, afin que le clou puisse librement tourner dedans, & elle par consequent virer de mesme alentour d'iceluy: la quatrieme est l'autre nauette du tout semblable à la susdictée en laquelle se void le clou bien rond, son bout estant en vis, afin que par le moyen de l'escroüe, qui est la cinquiesme, l'instrument puisse estre tenu serré, lors qu'il aura esté constitué selon la volonté de celuy qui s'en seruira. Voila donc ce qui est des parties: ce qu'estant bien considéré apportera grande clarté à tout l'instrument.

PROPOSITION III.

Compas nouveau par le moyen duquel on peut descrire toutes figures & droites lignes, selon l'ordre des pyramides qui ont telles figures pour bases.

DECLARATION DE LA III. FIGVRE.

Encores que ces inuentions de compas peuuent sembler inutiles, d'autant que par plusieurs regles desquelles les raisons sont comprises au sixiesme liure des *Elemens* d'*Euclide*, les figures proposees se peuuent faire: neantmoins elles ne sont pas à reietter, tant pour la subtilité de l'inuention que pour la commodité de pouuoir d'un seul tournoyement faire telle figure qu'on voudra. Et est la raison de ceci comprise sous la doctrine des figures parallelogrammiques & reciproques, comme il se verra par la declaration des parties de ce compas, auquel se voyent plusieurs iambes, d'entre lesquelles la plus longue & plus prochaine de la ligne orientale & qui luy est parallele, ayant vers sa partie meridionale trois pointes, est celle que nous nomerons immobile ou fixe, d'autant que lors qu'on se veut seruir de l'instrument, il faut qu'elle soit fichee en la superficie, par le moyen de ses trois pointes, de sorte qu'elle ne puisse bouger, mais soit comme l'aissieu, entour lequel tourne librement le reste de l'assemblage, lors qu'on en besongnera. En ceste iambe au dessus des pointes apparoit vne pyramide renuersee, de laquelle la base est vn triangle equilateral rectiligne, ce qu'empesche de voir la raison de peinture. & doit estre ladicte pyramide separable: cest à dire, se pouuant oster & mettre lors que besoing sera, estant en son trou quarré, comme doit estre aussi quarrée la partie du pied immobile qui entrera dedans. Outre ceste pyramide, il en fault auoir plusieurs autres qui se puissent aussi mettre en ceste iambe fixe, estans icelles ou quarrées, ou pentagones, ou hexagones, ou de tant de costez qu'on voudra, selon les figures qu'on veut faire. Car on ne peut appeler cest instrument compas, sinon entant qu'à l'imitation du compas, il doit descrire vne figure d'un trait, ce qui aduiendra selon la pyramide qui y sera posée. Dessus la pyramide vers septentrion paroissent en la iambe fixe six trous, lesquels sont mis là pour y passer vne cheuille qui viendra de la pyramide, afin de la hausser lors que la pointe ne se pourroit plus approcher, à cause de la grosseur d'icelle, quand on voudroit faire vne petite figure. Le reste de l'assemblage est tel que ceste branche parallele à la ligne de midi, & qui est loing de la septentrionale de 2. m. (estant la plus longue de celles qui luy sont paralleles) peut tourner librement à l'entour de la iambe fixe par le moyen du trou rond qui est à son bout oriental, estant tenue en raison par ce demi arc, au bout duquel est vn canon: de sorte que tenant en la susdictée branche tournante, il tourne avec elle, afin qu'elle soit mieux tenue en raison, & tourne plus iustement. A ceste branche il-y-a deux autres paralleles moindres en grandeur: dont celle qui luy est plus proche au bout oriétal a vne roulette, qui tousiours doit toucher la pyramide: à l'autre, qui est la plus meridionale, est au bout oriental la place ou canon quarré, où se doit mettre la pointe telle qu'on voudra. Ces trois branches entrent quarrément dans deux regles paralleles à la ligne orientale, & à la iambe fixe, esquelles en ceste figure apparissent des pointes, combien qu'elles n'y seruent de rien, & seroit meilleur qu'elles fussent toutes quarrées à bas. car elles seruent beaucoup à tenir droites les pieces, d'autant qu'elles se reposent sur la superficie, sur laquelle se doit descrire la fi-

Des figures de ce Theatre.

gure. Et n'est pas hors de raison qu'elles y soyent, d'autant que s'il n'y en avoit qu'une, les branches pourroyent varier, ce qu'elles empeschent. Outre tout cela apparait vn arc Turquois, duquel le milieu est ioint à la regle du milieu, sans qu'il s'en puisse separer, estant aussi attaché à la branche plus occidentale : lequel sert pour conduire l'ouvrage. Car la pointe disposée selon la distance qu'on la veut, de la iambe mobile, vne main mise à la iambe immobile, & l'autre à cest arc, en tournant on pousse tousiours la regle du milieu contre la pyramide : de sorte que la pointe va comme la pyramide, & fait au tour vne figure parallele à ladicte pyramide, non pas comme elles sont descrites ici dessous. car c'est l'autre compas qui les fait : mais cestui-ci fait celles qui sont de droites lignes, & qui se rapportent à celles-ci & plusieurs autres semblables, selon la pyramide qu'on y aura mise. Ce qui s'entendra par ce que j'ay desia dict, que pourra experimenter sans crainte celuy qui aura la moindre cognoissance des premiers elemens de ces sciences.

P R O P O S I T. I I I I.

Autre compas nouveau par lequel on décrit les figures de courbes lignes, lesquelles respondent aux figures de droites lignes, & ce selon l'ordre des pyramides qui ont les figures de courbes lignes pour base.

DECLARAT. DE LA I I I I. FIGVRE.

C E compas est conioint avec l'autre, & quand l'un & l'autre seroyent semblables, n'importeroit rien. car ils ne doyent estre differens qu'en la pyramide, leur usage estant du tout pareil, & la maniere de s'en servir en tout semblable: cestui-ci faisant les figures qui sont descrites au precedent pourtrait, d'autant que la figure se rapporte à la pyramide qui est mise au pied immobile du compas. Quant au reste, cestui-ci a des particularitez qui ne sont pas en l'autre, comme l'autre en a qui ne sont pas communes à cestui-ci. Et ceci est fait afin qu'on puisse en faire selon la commodité. car estans tous deux semblables, seroit tout vn, d'autant que si la pyramide de droites lignes est mise en cestui-ci, il fera les figures de droites lignes : comme si la pyramide de courbes lignes est mise en l'autre, il fera ce que fait cestui-ci. Toutesfois ces canons qui sont es regles perpendiculaires, sont au lieu des trous de l'autre, & seruent au besoin si la superficie n'est pas platte, comme si le centre est plus haut ou plus bas que le lieu où doit estre la circumference pour hausser & baisser la pointe. Le reste est semblable à l'autre, & en doit estre comme d'iceluy. Ce que le diligent lecteur pourra cognoistre, s'il se remet en memoire ce qui a esté dict.

P R O P O S I T. V.

Compas non encore veu, & qui est vniuersel pour descrire tout en vn trait la figure ouale, ayant vn de ses deux diametres tant long, & l'autre tant court qu'on voudra.

DECLARAT. DE LA V. FIGVRE.

L' O U A L E est vne figure qui pour sa beauté se trouue souuent es edifices & plusieurs figures: pour laquelle faire il y a beaucoup d'inuentions. Car les massons la font, en piquant deux pointes, & par vn cordon tournant alentour, icelles deux pointes estans comme vn seul centre. D'autres font deux cercles s'entrecoûpans & passans par le centre l'un de l'autre, puis les rognent par leur haut: autres les font plus estroittes, autres plus longues: & ce non sans beaucoup de traits de compas, qui quelquesfois gastent la besongne sur laquelle on fait l'ouale. A toutes lesquelles incommoditez on preuient par le moyen de ce compas, qui pourroit estre comme les dessusdicts, s'il n'y avoit qu'une sorte d'ouale, selon laquelle seroit la pyramide, ou bien il faudroit infinies pyramides. A quoy remede cest excellent compas, duquel la gentillesse & commodité ne cede point à celles des autres. Mais afin que nous les cognoissions, entendons ses parties, qui sont telles. A scauoir vne iambe fixe comme es autres, alentour de laquelle tourne le reste de l'assemblage, comme es autres, ayant la branche septentrionale semblable à celle du premier qui est en la 3. figure avec
B. ij.

Declaration

une autre aussi semblable, & qui luy est parallele, qui est vers midi. Ces deux branches entrent quarrement en deux regles perpendiculaires, paralleles à la iambe fixe: desquelles celle qui est au milieu porte la pointe, & l'occidentale doit estre toute quarree au bout pour mesme cause que i'ay dicté ci-dessus. Tout ceci appartient au mouvement, & à la tenir en raison. car le reste sert, & est la cause de la description de l'ouale. Au pied fixe apparoissent deux boules rondes: dont l'une est loing des pointes de 1. m. & 7. p. & l'autre loing d'icelle environ 1. m. Autour de chacune est un orbe ou corps circulaire, fait en mode de tranchoir assez espais, afin qu'une vis puisse entrer en son espaisseur pour le serrer contre le pied fixe, lors qu'il aura esté constitué par l'operant: estant ladicte vis plus bas qu'à la moitié de l'espaisseur, afin qu'elle n'empesche pas une navette qui est en chacun orbe, mise en iceluy si proprement qu'elle y ait son libre mouvement autour de la iambe fixe, tenant à un autre petit orbe, mis sur le premier, & qui est mobile: car le premier est fixe. Quant à la vis qui paroist en la navette, elle ne sert de rien, d'autant que la navette doit estre d'une mesme piece que la regle fendue qui en vient dans la fente en laquelle entre la branche du milieu perpendiculaire, de laquelle l'approcher au centre est retenu par le canon qui se serre à vis à la regle fendue. Et ceste branche perpendiculaire du milieu a libre mouvement sur les deux venans d'orient en occident, afin qu'au mouvement estant poussée par la main, elle approche & recule du pied immobile. Ce qui se fait à cause du panchement des orbes, d'autant que s'ils estoient droitz (c'est à dire paralleles à la superficie sur laquelle on veut descrire l'ouale) on descriroit un rond: mais estans penchez, leurs diametres s'accourrissent, à cause que la circonférence s'approche du pied immobile, qui est le centre. De là vient la façon de l'ouale, soit que les regles se haussent ou baissent. Quant à la branche occidentale perpendiculaire, elle tient droittes les autres, & doit estre quarree par son bas, deubât estre serrée sur la branche meridionale avec une vis, comme par en haut vers septentrion elle l'est sur la branche septentrionale. Le reste du mouvement est comme aux autres.

PROPOSIT. VI.

Compas de nostre inuention comme les autres, lequel de long temps auons communiqué à plusieurs, pour descrire en un plan toute ligne vraiment spirale, sans aucun entortillement de corde, ni autre deceuable façon de faire.

DECLARAT. DE LA VI. FIGVRE.

L'UTILITE de ce compas n'est pas moindre que celle des autres, d'autant qu'il aduient souvent qu'es bastimens on en a bien affaire pour ceste maniere de ligne, qui se fait par le moyen du compas ordinaire, mais à plusieurs fois, estant besoin d'ouurer ou refermer le compas, diuers centres sur lesquels on besongne estās constitués. Toutesfois encor par ceste façon i'amaïs elle n'est si naturelle que ce compas la décrit. Lequel est en ceste figure tout cōplet vers la ligne de midi, le reste qui est au dessus n'estāt que ses parties ou presentes ou futures. De toutes celle qui est la plus prochaine du compas entier est un canon dās lequel est tout l'artifice du mouvement de la pointe en limaco. Au bout occidental dudit canō est une pointe, laquelle se fiche sur la superficie ou on veut descrire la ligne spirale, afin que le corps du compas tourne alentour d'icelle, elle estāt au cētre. Par haut le canō a une renure ou fente tout de son lōg, faite en queue d'hiron de, dans laquelle puisse entrer une regle faite à l'equipolent: au bout occidental de laquelle sera la pointe mobile, cōme il se peut voir en la partie de dessus, le canon allant vers septentrion: & au bout oriental sera une escroüe, avec laquelle ici elle n'est pas bien iointe. car ce qui les tient ensemble la doit prendre par dessous, afin que le clou n'epesche que la regle ne coule aisēmēt en la fente ou renure. Ceste escroüe qui est iointe à icelle vire alentour de la vis qui s'y voit, où mesme elle est assemblée. Ceste vis doit estre au milieu du canon, ayant libre mouvement sur son puiot, qui se met au trou rond, qui apparoist en l'instrument complet vers occident, son autre bout estant fixe en ceste roulette qui est aupres de la ligne d'orient. De toutes ces parties icy le compas estant composé, la roulette ayant libre mouvement circulaire, le compas appuyé sur icelle & sur sa pointe, lors qu'on vient à mouuoir le compas, la roulette tourne au moyen des dents qui sont autour d'elle: & tournant elle fait aussi tourner la vis qui pousse l'escroüe, qui est tenue en raison par la regle, laquelle aussi par mesme moyen est poussée: de façon que petit à petit la pointe mobile se retire du centre, & décrit le limacon: lequel se fait de plusieurs manieres, selon les vis qu'on met dedans le compas, dont on en voit deux sortes vers septentrion. Quant à ces deux vis qui sont au canon vers orient, elles seruent pour faire tenir la roulette par le moyen d'un cercle mobile, qui estant fixe au canon, fait que ceste roulette ait son mouvement.

PROPO.

Des figures de ce Theatre.

PROPOSIT. VII.

Tour geometrique, & non reconnu en aucun lieu, pour avec vn seul calibre reduire & tourner le cylindre & cone en forme ouale telle qu'on voudra avec ses instrumens, & ce de toute matiere qui se peut tourner.

DECLARAT. DE LA VII. FIGURE.

*L*A gentillesse & subtilité de ce tour est telle qu'elle ne se peut assez priser. car par l'intelligence d'iceluy on en peut constituer de telle sorte que par leur moyen on pourra tourner non seulement en ouale, mais aussi en quelque autre maniere que ce soit. Et n'est point à mespriser ceste facon de tourner. car avec le plaisir elle apporte utilité aux artisans, qui par son moyen auront plustost & mieux fait vne piece d'ouvrage, que par l'aide de plusieurs vtils qui sont propres à leur mestier. Pour à quoy paruenir, il faut entendre ses parties, qui sont premierement (comme es vulgaires) les pieds & l'assemblage, & les testes mouuantes, la marche & la perche: les particularitez estans aux testes telles que nous les descrirons. Du bout des pieds vers septentrion sortent deux testes immobiles: l'une, orientale: l'autre, occidentale. En l'orientale est vn trou quarré, ou passe vn bois quarré assez long, qui sert pour approcher & reculer les pointes qui doiuent porter la besongne, & les testes du milieu qui sont mobiles: en l'occidentale (comme aussi en l'orientale) est le bout comme du manche d'une broche, qui tourne au trou rond qui est en ceste teste. Les deux testes mobiles sont percees à iour pour receuoir l'aisieu es pointes qui tournent, auxquelles se met la besongne. Or aux parties de l'aisieu des pointes qui sont entre vne teste fixe & vne mobile apparoissent deux orbes comme ceux qui sont au compas à faire l'ouale, desquels depend toute la subtilité du tour, ayans leurs centres sur la mesme ligne que le centre de la besongne, estans tellement faits qu'on les peut constituer librement selon la facon qu'on veut donner à l'ouale, ne plus ne moins qu'au compas ou il y a deux ronds comme ici, qui seruent à mesme fin. car ils sont pour la conduite de l'outil. Et se doiuent les orbes constituer l'un comme l'autre par le moyē des quarts de cercles dentez qui s'y voyent. Or quant à ce que les bouts de l'aisieu qui les portent sont coudez, cela est fait pour donner plus de force au mouuement. car outre cela ce seroit tout vn s'ils estoient droits. Au reste les deux testes mobiles sont fendues de la largeur d'un ais, qui y entre librement, & y a son mouuement haut & bas. Cest ais la est troué, & a au milieu vne fente en mode de serpent pour mettre le fer selon la volonté de l'ouurier. (car il conduit l'instrument, la main ne faisant que le soutenir) & s'appuye l'ais sur les ronds qui au mouuement la font hausser & baisser: de maniere que le fer ne touche l'ouvrage, que selon que hausse ou baisse l'ais percé, auquel est l'outil. Par ainsi est euident, selon la description de l'ouale, que les cercles perdent leurs ronds, en esgard à l'aisieu duquel ils approchent de deux costez. Or sont ici mis deux orbes, afin de pouuoir faire l'ouale à volonté, d'autant qu'il faudroit auoir infinies ouales. D'auantage, quant à ce qui se voit vers septentrion, sont les vtils & l'aisieu avec la besongne. Il est à noter ici que si au lieu des cercles on y met des autres figures telles que celles que décrit le second compas, on tournera de mesme les figures, la raison ne changeant point.

PROPOSIT. VIII.

Autre nouveau genre de tour tiré du precedēt, pour cauer & ouurer en forme d'ouale taces & gobelets de toute matiere qui peut endurer les vtils de fer.

DECLARAT. DE LA VIII. FIGURE.

*A*INSI qu'il est plaisant de tourner en ouale ou autrement, selon ce qui en a esté déclaré ci deuant, il est agreable de creuser: car volontiers l'un ne va gueres sans l'autre, principalement estant question de quelques beaux vases, dont les seigneurs sont curieux, & pour lesquels se font ces choses. Pour à quoy paruenir est présenté ce tour tiré de l'autre, ayant la base mesme, & les testes semblablement, fors que l'une est coudee: a scauoir celle qui sort du pied oriental, afin que plus aisement l'ouurier se puisse appuyer dessus: le reste apparoist à l'œil. Entr'autres l'orbe qui est entre les deux testes mobiles avec son aisieu, qui doit estre pour le plus seur accompagné d'un autre, comme le mostre la figure qui est au dessus du tour. Quant au reste, on le peut accommoder à plaisir, suyuāt tousiours le trait de l'inuention, & obseruāt qu'en

Declaration

la teste immobile occidentale soit vne pointe où se mette l'ouvrage: & que les deux testes mobiles soyent fendues, non pour mettre vn ais, comme au precedent, mais le manche de l'vtil, lequel s'appuye sur les orbes, & par iceux est haussé & baissé pour la forme de l'ouale, & de l'autre sorte de figure qui y seroit. Quant aux trous quarez qui sont en la teste mobile de deuers orient, ils seruent à mettre vne cheuille pour soustenir l'vtil lors qu'il n'y aura qu'un orbe: toutesfois il vaut mieux qu'il-y-ait deux orbes, pour la cause ia alleguee.

PROPOSITION IX.

Tierce espece de tour non encore veue, & qui n'est pas sans subtilité, pour engrauer petit à petit la vis alentour de toute piece longue & ronde, voire mesmes ouale.

DECLARATION DE LA IX. FIGURE.

La facilité qui est en ceste machine monstre estre possible ce que difficilement beaucoup voudroyent croire, veu que le naturel de la vis n'est pas que son areste soit de cercles paralleles, mais qu'elle aille en mode de ligne spirale. Quant à l'utilité, ce tour en a beaucoup, d'autant qu'il depeche en peu de temps ce à quoy il en faut beaucoup consumer, comme l'usage commun le monstre. Mais afin que nous entendions le total, venons aux parties.

Ce tour est different en beaucoup de parties aux precedens, combien que sa base soit tousiours semblable, estant la plus propre, plus certaine & plus usitée: veu qu'on n'en scauroit faire qui eust moins de parties, & qui peust seruir autant. Mais les testes sont dissemblables. car ses pieds sont eleuez au dessus du tour vers septentrion, environ de deux mesures, constituant ainsi vers occident & vers orient les deux testes fixes, comme es autres: l'une d'icelles, a scauoir l'occidentale, ayant en soy la pointe sur laquelle vn bout de l'ouvrage tourne, estant loing de la base du tour de 23. p. Entre ces deux testes fixes sont trois testes mobiles: dont les deux qui sont vers orient, sont petites & comme les communes: mais l'occidentale est plus haute, & est de telle grandeur qu'elle puisse porter la pointe sur laquelle l'autre partie de la besongne tourne. Les deux petites & semblables testes seruent à porter vne vis, qui cause le mouuement tel qu'il fait aller le fer de l'instrument de la facon que la vis est tournee. Ceste vis est tenue dans vn bois creux, où elle est supportee en toutes ses parties. Au milieu du bois creux est vne escrouë fixe, en laquelle meut la vis, de facon qu'elle s'approche & recule par le mouuement. Le bout occidental de la vis pousse vne piece quaree, en laquelle il tient à pinot, & par le moyen d'une cheuille demeure le pinot estant entaillé, de sorte qu'il ne puisse sortir, & ce ainsi comme les vis es presses des libraires en la part qui est toute ronde. Au bout dudict bois pousse par la vis est le manche de l'vtil, qui doit autrement qu'il n'est ici pourtrait, auoir mouuement haut & bas, afin qu'il puisse estre tiré de l'ouvrage ou poussé contre iceluy. Car lors que l'ouurier tourne, il faut que le fer attrape l'ouvrage, & lors qu'il destourne, il faut que ledict fer s'en retire: comme scauent bien practiquer les tourneurs. Le reste de ce qui est ici depeint, appartient au mouuement tant de la vis que de la besongne, & de l'instrument. Pour quoy bien entendre, il est besoin de scauoir les parties qui y sont propres & adaptees en ce pourtrait. Au haut des testes fixes vers septentrion est vne perche droite & ronde, parallele à la ligne septentrionale, laquelle peut librement mouuoir dans les trous qui sont ausdictes testes où elle entre, ayant en son milieu & vers les extremités trois barrillets où s'entortillent des cordes, comme il appert en la figure. En celuy du milieu la corde deuidee a vn contrepois à vn bout, & de l'autre est tenue de la main de l'ouurier, qui en la tirant donne le mouuement qui est ramené par le contrepois. Car celle qui est au barrillet d'orient, y est attachee par vn bout. puis environnant le bout oriental de la vis a vn contrepois à son autre bout: & l'autre qui est au barrillet d'occident, y tient aussi: puis estant deuidee entour vn bout de l'ouvrage, comme on fait ordinairement, à son autre bout a vn contrepois qui avec les autres ramene le mouuement. car l'ouurier tirant sa corde, fait tourner la perche & les barrillets, & par consequent l'ouvrage & la vis. L'ouvrage tournant se prepare à se faire entamer par le fer. car le fer n'entame point s'il n'est poussé, ou si la chose qui doit l'estre, n'est remuee. Puis quand l'ouurier remene la main en haut, les contrepois retirent, & ainsi recule la vis, qui auparauant poussoit l'vtil, en le poussant autant que l'ouvrage tourne, & retirant autant qu'il destourne. Il-y-a à ceste heure pour le mouuement de l'vtil vn solineau sous le tour parallele à la terre qui se voit ici loing de la base du tour de 7. p. & a de long 2. m. 14. p. passant d'un costé & d'autre les iâbes du tour qui sont fendues de sa grosseur. A chaque bout dudict solineau il-y-a vne piece de bois quaree, longue de 1. m. 8. p. au bout de chacune desquelles il-y-a vne corde qui passe par deux poulies tournantes es lîges qui sortent des testes fixes, loing du bout d'icelles, qui est vers septentrion de 10. p. ayant à leurs autres bouts

Des figures de ce Theatre.

bouts vn contrepois, afin de ramener le mouvement que l'ouurier aura fait avec son pied qui est en l'estrieu qui tient au soliveau: auquel soliveau est le bout du manche de l'outil, ayant libre mouvement d'orient en occident, & au contraire. Maintenant quand l'ouurier tire la corde, il leue le pied, & les contrepois qui tirent le soliveau poussent le fer contre l'ouvrage: & lors qu'il laisse aller sa main, il presse du pied pour retirer le fer. De ceci pourra entendre le curieux lecteur l'utilité de la machine.

P R O P O S I T. X.

Quatriesme tour, & qui n'a encore esté veu, lequel sert pour polir & couper le marbre en plaques & tables (comme aussi toute autre espece de pierre dure) pour les ornemens des edifices sumptueux & magnifiques.

DECLARAT. DE LA X. FIGURE.

C E S T E machine proprement n'est pas vn tour, d'autant que l'effect du tour est que par son moyen le fer ou outil va alentour de la piece qu'on tourne: toutesfois elle est ainsi appelée pour la similitude du mouvement qui est le tour & retour. Mais sans nous amuser à la conuenance du nom, si nous entendons ses propriétés, la declaration des parties qui le contiennent sera plus desirée. Or est-il qu'il peut seruir (comme le dit la proposition) à ceux qui se meslent de polir les pierres, ou les couper, comme à ceux semblablement qui licent le carton: & en general à tous ceux qui usent du polissoir, chacun le pouuant accommoder à sa fantaisie, entendant ses parties qui sont telles.

P R E M I E R E M E N T le support ou assemblage qui soustient le reste des parties esquelles gist le mouvement & usage de l'instrument, est quarré, long, en mode d'un establier de manouurier, estant cependant ferme & assésuré, tant pour soustenir le faix, que pour endurer le mouvement violent qui se fait quand on en besongne. En la partie meridionale apparait vne vis, ayant vne signole à son bout oriental, par le moyen de laquelle elle est menée: & entour ceste vis est vne escroûe qui va & vient autour d'elle d'orient en occident, & au contraire: estant toutesfois tenue en raison par vne piece de bois qui d'elle va vers l'angle de septentrion & d'orient. A ceste piece de bois est vne autre parallele & pareille deuers occident, assemblees l'une à l'autre vers l'angle de septentrion & d'orient, par trois autres pieces: l'une estant ou se void l'ouurier, & les deux autres aux bouts de l'assemblage de ces bastons en croix que lon nomme vulgairement happenilain, & que i'ay nommé sautereau. Et sont ioinctes ainsi les deux premieres pieces de bois l'une à l'autre en chassés, afin que tenues en raison ne s'approchent ni reculent l'une de l'autre, pource qu'à leurs bouts meridionaux est vn tour tournant sur deux pivoets, quasi comme es derrieres des chars sur lesquels on charrie le foin ou le bled. En ce tour passe vn bois droit qui a vers midi vn demi orbe percé à iour, & vers la fin septentrionale vn bois trauersier, de sorte qu'il est comme vn T. Et ladicte piece ainsi faite se nomme balance, pource que la pesanteur du demi orbe remene ce que l'homme premierement tire à soy. La partie septentrionale d'icelle est appelée la teste, qui a deux anneaux, dans lesquels entrent deux arcs de fer, qui finissent enuiron le bois de l'assemblage du chassés: lequel bois est le second, en commençant à conter de septentrion, & auquel finit le sautereau, ayant là sa premiere cheuille, hors laquelle il sort pour aller vers les arcs de la teste de la balance, auxquels il tient: de maniere que quand la balance approche de l'ouurier, le sautereau se serre: & quand elle se retire, il se pousse, pource qu'à son approcher elle fait eslargir ses arcs qui tiennent au sautereau, & au reculer elle les serre, la nature d'iceluy sautereau estant telle que lors qu'on eslargit ses premiers pieds, il se serre & accourcit: & quand on les serre, il s'allonge. Or au bout septentrional d'iceluy est le polissoir, ou fer à couper, que l'homme guide de la main droite, tirant de la gauche vne corde qui respond à la balance attachée à icelle 16. p. loing du tour tirant vers midi, par le moyen de laquelle est fait le mouvement. car la balance pour la pesanteur de sa base, tire tousiours vers terre perpendiculairement. d'où vient qu'estant tiré par la corde, elle redemande son lieu: ce que luy empeschant le soudain tirement de l'ouurier, la met en branle, de sorte qu'elle fait aller & venir gay le couppoir ou polissoir par le moyen du sautereau. Qui est toute la subtilité de la machine. car quant à la vis, elle ne sert que pour faire changer de place au chassés, lors qu'on aura assez poli ou coupé en vne place, l'ouurier l'allant mener, ayant mis la main à la signole, pour puis recommencer & faire ce que dessus.

Declaration

PROPOSIT. XI.

Espece de contrepoids nouveau, lequel esbranlé par la force d'un ou deux ouuriers en forme de cloche, fait chauffer deux grands soufflets aux minieres, comme s'ils estoient agitez ou par cours d'eau, ou par cheuaux tirans & tournoyans.

DECLARAT. DE L'XI. FIGURE.

ENCOR que la peine des hommes soit la plus chere, toutesfois es lieux où on ne trouue pas d'aide d'eau, il est necessaire d'employer des homes. Parquoy les machines dont la subtilité & adresse fait qu'il y en faut moins, & que peu font autant que l'eau qui sert autrepars: ces machines-la, di-ie, ne sont pas à mépriser, entre lesquelles est ceste cy, la figure de laquelle est si claire qu'il n'est quasi point besoin d'interpretation: toutesfois pour l'amour des moins versez en ces matieres, ie declareray ce qui en est. Par l'aide de la balance deux hommes chauffent en ceste forge autant que huit, ou que l'eau qui feroit mouuoir vne roue, par le moyen de laquelle les soufflets haussent & baissent, ainsi qu'on voit es forges d'Alemagne & autres pays. Or i'ay déclaré quelle estoit ceste balance, toutesfois pour souuenance ie le rediray. C'est vne longue piece de bois, qui au bout qui doit tendre à bas, a vn demi orbe espois & pesant, par le moyen duquel le bransle se donne. Ladicte balance estant ici fichee enuiron son milieu a vn aisieu, sur lequel elle meut librement. Icele est vers orient pendue à vn pilier qui va de midi en septentrion, ayant son axe loing du bas du pilier 2. m. 4. p. lequel axe ou aisieu est croisé d'un bois, ayant à chaque bout vne perche, qui respond l'une à vn soufflet, & l'autre à l'autre, le pilier estant fendu pour donner libre mouuement audict baston. Ainsi aduient que quand les ouuriers menent la balance à tour de bras luy donnant bransle, ils haussent vn des soufflets & baissent l'autre: le haussent, quand le baston tire: le pressent, quand il pousse. Par ainsi ne faut point charger de poids les soufflets, lesdicts bastons les aidans, & les faisant aller plus de mesure que les contrepoids. car de telle force qu'ils les leuent, de telle aussi les pressent-ils. La forge est vers occident. Ce qui est clair à cognoistre.

PROPOSIT. XII.

Machine qui doit ensuyure la precedente tant pour sa nouueauté que vtilité: laquelle a la force de leuer le martinet par le moyen de deux hommes, tel qu'es forges le meine la force de l'eau ou de cheuaux tournoyans.

DECLARAT. DE LA XII. FIGURE.

DE TOUTS mouuements le circulaire est le plus naturel & plus parfait, & ce d'autant que les parties qui tournent estans egalemeut loin du centre, les suyuantes ne fendent point d'autre air que celui qui a esté fendu par les precedentes. Ce qui n'est pas au quarré, ny aux figures angulaires. car l'angle est tousiours plus esloigné du centre que les costés, sinon aux figures anormes: & par ainsi la superficie ou ligne passant son milieu va plus à l'aise que sa partie qui est vers l'angle. Partant le cercle en son mouuement estant le plus propre, on a choisi les roues rondes, desquelles le centre estant outrepassé d'un aisieu, le mouuement se fait vniforme, & par consequent egal. Or toutes roues n'ont pas mouuement ni force egale, mais les plus grandes font plus par leur mouuement que les petites, tant à cause de la pesanteur de leur faix que pour leur grandeur, qui leur cause plus de temps à mouuoir que non pas aux petites: & par ainsi estans plus long temps à faire leur tour que les moindres, s'il aduient qu'on le leur face faire en mesme temps, leur force sera plus grande. De telle grande roue est causée la force de ceste machine, qui est telle. Vers septentrion est vn assemblage de bois composé de deux fortes pieces, lesquelles soustiennent l'aisieu qui passe par elles & qui meut librement en ses trous. En cest aisieu y-a trois roues: la grande, telle que nous l'auons descripte, & deux petites. De la grande depend la force & vistes du tournoyement aide par les deux petites qui sont egales l'une à l'autre. Et quant à ce qu'elles sont plus petites que l'autre, il se fait afin que le mouuement soit plus violent. ce qui ne seroit pas si elles estoient toutes egales, d'autant qu'allant d'un mesme train, & mouuant de semblable motion, le mouuement seroit plus corrigé.

Des figures de ce Theatre.

corrigé. Ce qui aduient autrement. car les deux petites roües ayans leur mouuement pareil, tournent en temps egaux: & la grande roüe estant contrainte de faire son tour en mesme temps, le fait plus violent, à cause que sa nature (comme i'ay dict) est de tourner en plus de temps. Ainsi donc le tournement est si violent qu'il leue aisément la queue du martinet, le dict martinet estant fort pesant. Outreplus la force du mouuement est augmentee, par ce que l'un des ouuriers pousse par haut, & l'autre par bas: cestuy-la de deuers occident poussant par haut, & l'autre qui est vers orient, par bas. Ainsi eschappe le manche du martinet, comme la figure le monstre: lequel martinet est loing de la ligne de midi 2. m. 6. p. & d'occident, 7. p. l'enclume estant loing des mesmes lignes de 1. m. 18. p. & 1. p. & le point de la culbute du martinet, 2. m. 14. p. & 22. p. Le manche estant fendu afin qu'il embrasse la grande roüe deca & de la, pour venir aux chevilles qui l'attendent, & qui sont en l'axe passant outre, afin qu'en vn tour le martinet frappe deux fois.

P R O P O S I T. XIII.

Nouvelle machine à sier arbres & poultries, par laquelle deux ouuriers en faisant tourner ensemble deux roues, font autant que huit vulgairement: ascauoir aux forets où le cours de l'eau defaut, & en lieu où la machine soit tant basse qu'on puisse trainer le bois dessus à plein pied.

D E C L A R A T. D E L A X I I I. F I G V R E.

C E S quatre machines seruent aux lieux où l'eau defaut. car aux lieux où elle abonde, comme es quartiers d'Alemagne, où ils font estat de sier quantité d'ais, ces machines ne sont pas du tout comme celles-ci. car à cause que la peine des hommes y est employee, il est besoin d'y mettre ce qui y est requis, comme il s'entendra par la declaration suyuante. Toute la force du mouuement consiste en la grandeur des roues, qui est la cause qu'il seroit bon qu'il y eust ici trois roües comme deuant, pour la raison ia alleguee, mais la commodité de la machine ne le porte pas. Or la machine est bastie sur quatre pieces gemelles, encor que pour la longueur de la poultrie qui doit estre sise on en puisse mettre tant qu'il sera besoin, pour supporter le plancher sur lequel elle se tient. Des gemelles apparentes, la troisieme, en contant d'orient, s'esleue vers septentrion, de 3. m. 8. p. ayant un tour qui tourne sur ses puiots, loing du bas qui est vers midi 2. m. 12. p. A trauers ce tour passent deux bras semblables & paralleles, allans d'occident vers l'angle de septentrion & orient, loing de 1. m. 8. p. du bout oriental. Desquels pendent les sies qui sont attachees à vn bois, dans lequel entrent lesdicts deux bras, afin que quand se fera le mouuement, les sies tombent tousiours à plomb. Ce qui n'aduient pas si le bois où elles tiennent n'estoit comme i'ay dict. car s'il estoit fixe es bras, les sies ne pourroyent pas tomber à plomb, d'autant que le mouuement de leur support seroit arcuaire autour du tour qui seroit le centre, & le reste des bras passant, seroit le diametre. Parquoy il faut que par le mouuement la piece qui porte les sies se recule & approche des gemelles, d'autant que les sies ne doivent point s'approcher ni reculer à cause qu'on fait approcher la poultrie, comme il sera dict apres que nous aurons declaré le mouuement des sies, dont ce qui s'ensuit, est la cause. Vers l'angle d'occident & de septentrion où se void la figure d'un homme, est posé un tour duquel vn pied apparoit parallele à la ligne d'occident, haut de 20. p. l'autre pied disparoissant estant tout semblable, & ayant les mesmes parties que cestuy-cy: ascauoir vne roüe, en laquelle se void vn estouteau, qui est vne cheuille outrepassant, & qui est ici loing de la ligne d'occident de 19. p. & demie, & de la ligne de midi 1. m. 12. p. lequel estouteau par le mouuement attrappe les rayons de ceste grande roüe qui se void, dont le milieu est loing de la ligne de midi de 1. m. 13. p. & de la ligne d'occident 1. m. 15. p. vne autre toute semblable estant de l'autre costé, & par ainsi toutes deux sur vn mesme axe, lequel est soustenu de deux pieds qui sortent de l'assemblage. A leur dict axe est vne corde qui tient au bout de la poultrie à sier, de sorte que peu à peu elle est approchée des sies. Ce qui se fait quand les ouuriers menans les signoles font tourner les roües desquel les l'axe est coude: de sorte que le milieu d'iceluy n'est pas en telle ligne qu'il puisse respondre au centre des roües, mais est parallele à la ligne imaginaire qui en est tiree. En ceste partie la entrent les bouts de deux barres de fer, qui se rendent aux bras desquels pendent les sies. Parquoy aduient que quand les roües tournent, l'axe tournant tire & pousse les sies par la force des barres, icelles sies estans tenues en raison en un trou quarré ou entre leur bois: lequel trou est en l'une & l'autre poultrie du soustenement, & se void loing de la ligne de midi 1. m. 20. p. & de la ligne d'occident, 1. m. 14. p. Ce qui estoit à demonstrier.

Declaration

PROPOSIT. XIII.

Autre machine nouvelle posée en semblable lieu & maniere que la precedente, de laquelle peut sortir, (en temps de necessité) autant d'effect avec vn ouurier que de la deuantdicte avec deux, ainsi que sa delineation clairement le monstre.

DECLARAT. DE LA XIII. FIGURE.

PAR ceste machine on fait le mesme que par la precedente, mais vn homme seul travaille. Le sostenement est tout pareil qu'en la precedente, ayant la mesme roue, du moyen de laquelle sortent aussi des rayons qui sont poussez par le pied de l'ouurier, & non pas comme l'autre, ayant toutesfois le mesme usage. Quant à l'estat des sies, il est autre qu'en la precedente. car les gemelles du milieu se releuent vers septentrion, comme il appert par la figure, en leur bas estant une renure dans laquelle est tenue en raison la sie qui y coule. Quand ie di la sie, i'enten les bois lateraux qui la portent. Au dessus des susdictes gemelles est vn assemblage, au haut duquel (qui est en septentrion) est une vis bipartie, c'est à dire ayant l'arestre depuis la moitié iusques à vn bout allant d'un sens, & depuis la mesme moitié iusques à l'autre bout allant d'un autre. A chaque moitié est une escroüe allant & venant: de sorte qu'ensemble elles approchent de la moitié par vn mesme mouuement, & se reculent aussi de mesme par vn autre mouuement uniforme. A chacune des escroües est attaché le pied du sautereau qui est en l'assemblage sur les gemelles: duquel la teste tiét à la sie, laquelle meut haut & bas par le moyen d'iceluy. car les deux escroües s'approchant, elles le serrent. par ainsi il pousse les sies, & se reculant vers les bouts, elles le desffloient: & ainsi il attire en haut les sies, & le mouuement est cause par la main de l'ouurier qui tient une corde venant du bras de l'axe ou sont les vis, de ce bras di-je qui est vers occident. car au bout oriental de l'axe est la balance qui aide à l'ouurier. Et sont tellement disposez la balance & le bras en l'axe, qu'une ligne tirée de l'axe au point ou tient le bras qui fust parallele à la balance, constituerait un angle droit, ou bien sont constituez comme les palettes des aiguilles des balanciers des horologes mouuans, qui est tout vn: & ce afin que quand l'ouurier tirera le bras qui est parallele à la terre, la balance qui pend à plomb prenne branle. Ce qui ne se pourroit si bien faire si ledict bras & la balance estoient paralleles. Quant à ce bois cheuillé qui paroist, il sert à monter au haut de la machine.

PROPOSIT. XV.

Nouveau tombreau, ou brouette, par lequel avec l'œuvre d'un homme, en lieu principalement qui soit plain, on peut transporter autant de fardeau que par deux ou trois avec toute autre machine.

DECLARAT. DE LA XV. FIGURE.

LA proportion qui est gardée es charges aide beaucoup à les porter, principalement en ce qui se porte sur le dos, & qui se charrie par terre. L'exemple en est euidet aux hottes & charges de dos. car le porteur est soulagé beaucoup quand le plus pesant est en deuant. Ce qui est gardé en ceste broüette, où le corps est tellement fait que ceci s'y observe. Outre cela la proportion des roues y fait beaucoup. car si elles sont égales, le poix est égal, & se tire tout d'une venue, qui apporte grande difficulté au trainement: mais si celles de deuant sont plus petites, celles de derriere leur iettent le poix: de maniere qu'il est plus aisé de tirer. Aussi aduient-il que celles de derriere qui sont grandes, faisant vn tour sont de pescher les petites qui sont deuant, d'autant que la grande met plus de temps à tourner que la petite. Ceci bien entendu, ceste machine ne sera pas obscure. Or ici on void la roue de deuant qui est vers orient fort petite, & celles de derriere qui sont vers occident trois fois aussi grandes. Parquoy il est euidet que facilement on pourra par ceste broüete porter en lieu droit & en descendant, pouruen qu'on tourne le deuant derriere, & que l'ouurier tire apres soy la brouette, comme il est depeint ici, & en montant estant pousseé comme en lieu plain. Le reste appert. Ceste partie qui

Des figures de ce Theatre.

tie qui est vers septentrion est la figure des brancarts & du soustenement de la brouette.

PROPOSIT. XVI.

Nouveau chariot extrait du precedent tombreau, lequel porte presque autant de charge avec le tirage d'un cheual, que les chariots vulgaires avec le tirer de deux cheuaux.

DECLARAT. DE LA XVI. FIGVRE.

L A raison de la precedente estant bien entendue, ceste-ci sera claire. car c'est vne mesme, & est mesme proportion es roues. Tant seulement y-a difference que l'un est vne brouette, & l'autre un coche, ou chariot.

PROPOSIT. XVII.

Chariot nouveau & royal, lequel est vn peu plus ample que les vulgaires, mais aussi beaucoup plus commode. car en lieu inegal il se niuelle par son contrepoids (comme vne nasselle en eau tranquille) dont il ne peut renuerfer, ni par consequent endommager ceux qui sont dans sa liètiere.

DECLARAT. DE LA XVII. FIGVRE.

C E U X qui ont quelque intelligence de la physique, qui est la cognoissance des choses naturelles, peuvent entendre qu'il y-a deux milieux quasi en toutes choses, desquels l'un est iustement entre les deux extremitiez, & l'autre ou plus pres, ou plus loing d'icelles. le premier desquels est trouué par le compas, & l'autre pas le poix. En quelques vnes les deux sont en mesme poinct, comme il le faut obseruer en ceste machine, de laquelle toute la subtilité en depend, & se doit ainsi composer.

Il faut que les roues soyent basses, de sorte qu'elles n'atouchent point le corps de la liètiere, mais qu'elles soyent fortes & puissantes pour soustenir le faix. Le reste doit estre de trois pieces, dont l'une est la liètiere, & les deux autres ces deux pieces que lon void, où sont des pucelles à pieds de serpent, qui se ioignent par le front, desquelles le pourtrait simple est au vuide vers l'angle d'occident & de septentrion. L'une & l'autre de ces pieces la tient à l'aisieu des roues, & y est à puiot afin qu'elle puisse tourner: & est l'aisieu ioint à vn ais large, sur lequel se repose ladicte piece. Or ceste piece se met deuant & derriere afin que sur icelle se repose la liètiere qui est faite à balance, & a à vn bout & à l'autre vn puiot de fer gros, fort & long, sur lequel elle est balancee, le dict puiot estant loing egalelement du haut & du bas & des costez d'icelle. Ces puiots la se mettent chacun en vn trou qui est preparé au milieu de la piece de deuant & de celle de derriere, l'une & l'autre estant supportee sur les aisiens. On peut mettre au lieu du trou vne boule qui paroisse moins que demie, en laquelle soit le trou: mais le plus court est come i'ay dict. Il aduient de là que la liètiere est balancee, & par consequent douce, ayant les roues comme les autres, mais estant tiree par plusieurs cheuaux. Or s'il aduient qu'une roue tombe, la liètiere demeurant pendue sur ses puiots, sur lesquels elle tourne, comme le monde sur ses poles, ne pourra choir: & si deux roues d'un costé tombent, elle est aussi tousiours debout, les autres roues ne luy pouuans nuire. Ceci est euident.

PROPOSIT. XVIII.

Nouvelle forme de vaisseau, par le moyen duquel on peut porter plusieurs especes de liqueurs, tellement qu'elles ne se pourront eschauffer du soleil, comme es vaisseaux vulgaires.

Declaration

DECLARAT. DE LA XVIII. FIGURE.

La raison de ceci gist plus en physique qu'en mechanique, que ie declareray suivant à l'aventure le sens de l'auteur.

Ces deux pieces qui se voyent, l'une en orient, & l'autre en occident, sont chacune à part soy, le vaisseau complet & assemblé de ses parties, estant vne mesme & semblable chose : mais le reste sont les parties dont tout le vaisseau est composé dedans & dehors : horsmis ce vase qui est là mis pour remplissage & beauté. De ces parties qui sont au milieu, celle qui est vers septentrion se conioint à celle qui est vers midi, pour parfaire le corps du vase dans lequel se met ce qui se void entre deux, qui est un sac de cuir boullu, & un tuyau de fer blanc, ainsi entortillé pour pouvoir remplir le vaisseau : & sont assemblez en iceluy par le moyen de la signole qui est en la partie qui regarde midi. Ainsi par son moyen tout estant assemblé, on met dedans le tuyau la liqueur qu'on y desire reserver contre la chaleur : & par l'endroit qu'on la met on la tire puis apres, le robinet estant coudé, afin qu'il ait la bouche aussi bas que le tuyau se baisse. car autrement toute la liqueur ne sortiroit pas du vaisseau. Or quant à ce que la liqueur mise en ce vaisseau soit tenue plus fraische, cela advient premierement par le fer blanc, qui a ceste vertu de rafraischir, à cause de l'estameure ou il-y-a de l'estain, duquel le propre est de rafraischir, & du fer blanc qui se conserve en la fraicheur, & par consequent la garde : puis apres le sac clost si bien le tout qu'à peine le chaud y peut-il entrer si soudain : & finalement l'épaisseur du tonneau y sert, lequel si on fait d'airin resistera plus à la chaleur que si on le fait de bois.

PROPOSIT. XIX.

Autre forme de vaisseau quasi de mesme usage que le precedent, outre ce qu'il peut par singularité euacuer de diuerses liqueurs par le mesme pertuis qu'il aura esté rempli, ascauoir en telle mesure qu'on voudra, sans qu'elles se meslent aucunement ensemble.

DECLARAT. DE LA XIX. FIGURE.

La subtilité de ce vaisseau consiste en l'artifice, lequel (comme ie declareray) apportera plaisir au lecteur. Or quant à ce qui appartient au rafraichissement, ie vous renuoye au precedent : mais à ce qui appartient à l'emplir & vuidier (ce qui se fait par un mesme trou, si on veut, ou par deux) ie le declareray. Pour l'emplir par le mesme trou que lon le vuidera, il nous faut fabriquer la canelle ou robinet ainsi qu'il s'ensuit. Le vase entier & parfaict est depeint vers midi pres la ligne d'occident, dans lequel se met cestui-la qui se void vers septentrion, qui est diuisé en trois parties, & se peut diuiser en tant qu'on voudra : mais soyent ces trois que nous voulons emplir de diuerses liqueurs par un mesme trou, lequel sera en la partie loing de la ligne de midi 3.m. 5.p. & de la ligne d'orient 1.m. 2.p. Le trou estant composé, pour l'emplir il faudra leuer le vaisseau sur le costé parallele à la ligne d'occident : mais pour le vuidier, il le faudra laisser comme il est. Et le trou se compose ainsi. On fait venir de la partie du tonneau qui est vers occident, en laquelle nous mettrons du vin clair et, un tuyau qui se rend en ceste piece ronde qui se void au lieu remarqué cy-dessus, dans laquelle entrant il se coule deux fois, & puis vient finir au deuant. De la seconde partie, en laquelle nous mettrons de l'huile, il en vient un qui va de mesme. Et de la troisieme on nous mettrons du vin blanc, un qui se rapporte avec les autres : & tous trois sont dans un autre canal, & remplissent son rond, ce canal desborde environ deux doigts outre les trous susdicts, afin qu'en iceluy tienne un bois qui les bouche ensemble. En ce bois il-y-a trois trous respondans aux trois canaux, en chacun desquels trous se met un fossét ou cheuille : de sorte que quand on ne veut qu'une liqueur, on n'oste qu'un fossét : quand on en veut deux, on en oste deux : & quand on en veut de toutes, on tire le bois qui les tient toutes : ayant premierement empli le vaisseau par les mesmes trous, en mettant l'entonnoir en l'un, puis en l'autre. Mais si on veut l'emplir par un autre, ce sera par celuy qui est loing de la ligne de septentrion 1.m. 11.p. & de la ligne d'occident 1.m. 16. p. lequel est fait suivant la raison de l'autre, mais il n'a pas le bordon troué. Le reste est evident par cela qui a esté dict.

PROPO-

Des figures de ce Theatre.

P R O P O S I T. XX.

Nouvelle delineation de machine, pour rouler & deplacer les pieces assez grandes, tombees dans l'eau, afin qu'apres en mesme lieu on puisse planter des paux pour faire vn nouveau pont, ou en refaire vn vieux, ou bastir vn port ou fort contre les vagues.

DECLARAT. DE LA XX. FIGURE.

E S perches & autres pieces dont se font les balances, ordinairement les deux milieux sont en mesme poinct. De là aduient que lors qu'on met le poinct de la culebute hors d'iceluy, le plus long bout emporte l'autre, tant pource qu'il est plus de temps à faire son tour, que pour sa pesanteur, pource que faisant son tour, il fait de pescher le petit qui le fait en mesme temps, & non pas egal. car à l'œil il semble pluſtoſt paruenir au deſſus. Sus ceste raison est fondee ceste machine, de laquelle la principale partie est ceste loüe à 3. pieds, qui est loing de la ligne de midi 20. p. & de la ligne d'orient 23. p. En la fabrication de laquelle a failli le peintre. car sa teste qui est cheuillée à la perche, doit tourner sur elle à puiot, afin que quand ce viendra à tourner, il se face librement. car autrement ses pieds fichés en terre empescheroient tel mouuement, qui est le plus necessaire en ceste machine. L'autre partie est ceste grande perche longue de 2. m. 16. p. laquelle entre librement entre ces deux solineaux qui sont au bout meridional de la nasselle qui porte les ouuriers, laquelle soustient & guide aussi la machine. Le bout meridional de la perche est fait en cuillier, ou en facon du bout de la houlette d'un berger, les trous qui y paroissent seruant à mettre pres ou loing la loüe selon l'endroit de l'eau ou on se trouue. Maintenant le tout estant ainsi constitué, la piece à mouoir se met en la cuillier à force de pousser la nasselle contre icelle, laquelle sera bien pesante si le grand bout de la perche ne l'emporte avec vn peu d'aide. Cela fait, on tourne la nasselle, qui par le moyen de la teste de la loüe qui tourne, fait tourner la balance, estant souleuee par le moyen des cordes qui sont en sa partie septentrionale: puis ainsi on met la piece ou on veult. Or les gasches du bateau sont faites à trois pointes pour mieux entrer, & sont retenues par le petit bois qui les croise vers les pointes, afin de ne reculer point, mais d'approcher tousiours.

P R O P O S I T. XXI.

Artifice nouveau pour repurger les immundices & meslanges de pierres, herbes, & autres semblables empeschemens d'un port ou estang ia des long temps delaissez inutiles.

DECLARAT. DE LA XXI. FIGURE.

*T*OUTE la force & subtilité de ceste machine depend des tours. car en midi il-y-a vn tour, comme aussi en septentrion, qui seruent à tirer & souleuer le plancher qui est soustenu sur quatre tonneaux: sur lequel est vn tour qui tire vn rasteau en demi cercle, duquel les dets sont courbees, afin de mieux arracher les pierres & l'ordure. Quant au reste, il est si aisé que d'en discourir d'auantage, me semble temps perdu, veu mesme que la figure est assez claire d'elle mesme.

P R O P O S I T. XXII.

Nouvelle raison de planter dans l'eau des paux (de toute grandeur & grosseur) à plomb, pour soustenir fermement toutes pesanteurs, soit qu'on vueille dessus fonder vn pôt ou vne forteresse, ou par eux mesmes destourner la mer à la part ou on peut dresser commodement vn port.

Declaration

DECLARAT. DE LA XXII. FIGURE.

C'EST une chose assez ordinaire & aisée, que la façon vulgaire dont on use à planter les paux pour faire ponts ou autres bastimens : mais à cause de la grande roue & des autres pièces qui sont grandes, & qui tiennent beaucoup de place, il est difficile de pouvoir aisément les faire porter par un bateau : ce qui se peut faire ici, le tout étant racourci en ceste machine, qui est faite en telle manière qu'elle est non seulement aisée à porter sur l'eau, mais aussi peut servir comme les autres, sa force dependant de celle de la vis.

Toute ceste machine donc portée sur un bateau est faite en forme de triangle scalene rectangle, dont la base est parallèle à la ligne d'orient, & tourne vers elle. La perpendiculaire est parallèle à la ligne de midi, & est aussi tournée vers elle : la tierce & plus longue est tournée vers l'angle de la ligne d'occident & de septentrion. Or est ceste machine ainsi tournée pour plusieurs raisons. Premièrement afin qu'elle soit plus portative. car un triangle tient moins de place qu'un quarré ou figure de quatre costez ou plusieurs. Outreplus elle est en scalene rectangle : scalene, afin que la perpendiculaire étant aussi grande que la base, elle ne face pancher l'angle droit en bas, & aussi afin qu'il ne faille pas tant de poix pour la retenir : rectangle, afin que les moutons puissent choir à plomb pour enfoncer les paux, comme il est besoin. Au reste il faut entendre le residu du bastiment de la machine.

La perpendiculaire est faite de quatre pièces de bois, dont les deux des extremités ont des renures, afin que les moutons puissent couler aisément entre deux, la plus longue & qui est estendue sur l'angle droit, est composée de deux espaces, dont en l'un (qui est vers septentrion) se met l'ouvrier : en l'autre, outre l'assemblage, que l'on peut recueillir de la figure, auquel il y a deux vis, aux bouts desquelles & à chacune y a une roue dentée à dents de pigne, lesquelles sont menées par une plus grande dentée de mesme. Que si cela ne suffit pour tirer le faix des moutons, il faut adjoûter dedans à l'axe de la signole qui mene la roue, la vis sans fin. En chacune des vis y a une escroûe, qui est tenue en raison par les renures qui sont es pièces de bois, & sont ces escroûes tellement disposées, que quand l'une monte, l'autre descend : ainsi toujours un des moutons travaille, & cependant que l'un monte, la corde va querir celui qui est échappé, que l'ouvrier qui est vers midi ratache & puis fait reschapper.

PROPOSIT. XXIII.

Machine composée nouvellement & non vulgairement pour planter obliquement des paux en l'eau, afin que les paux precedens fichez à plomb ayent plus de force à soustenir ce qu'on voudra fabriquer dessus.

DECLARAT. DE LA XXIII. FIGURE.

LES guindes ordinaires dont se servent les sieurs de bois sont ressemblantes à ceste machine, de la figure de laquelle on peut tirer tout ce qui appartient à la fabrique d'icelle. Au reste il n'y a de nouveau que la perche qui porte le mouton, laquelle n'est pas constituée pour frapper à plomb, mais à angles aigus & mouffes. Ce qui se peut voir par la figure que l'auteur a tirée de la cinquième du troisieme livre de Vegece, laquelle sert à lever fardeaux : mais par la raison du lever on la peut accommoder à planter telle manière de paux.

PROPOSIT. XXIIII.

Forme selon laquelle (à l'aide des deux precedentes) les pilotis sont de toutes pars liez ensemblement, pour fermement & perpetuellement soustenir l'engin qu'on voudra qu'ils portent au dessus.

DECLA-

Des figures de ce Theatre.

DECLARAT. DE LA XXIII. FIGURE.

AYANT montré la maniere de planter les paux par les deux precedentes, tant à plomb que de biais, ou obliquement (s'il est loisible d'appeler ici oblique ce qui est droit, & toutes fois ne tombe pas à plomb sur terre) afin de montrer l'utilité des choses dictes, nostre auteur a ici fait peindre la constitution des paux, afin qu'elle estant entendue, on trouue que ce qui a esté dict n'est pas inutile.

PROPOSIT. XXV.

Nouvelle composition de moulin à bras pour fouler les draps, & broyer le papier. Item pulueriser les espiceries, & concasser les cail-lous farcis de metaux, pour les rendre plus fusiles. Item aussi à polir ou aiguïser tous instrumens de fer en desplacant les bassecules & les pilons.

DECLARAT. DE LA XXV. FIGURE.

C E que j'ay dict en la douzième estant bien entendu, la raison de ceste machine sera claire, laquelle va ainsi. Le tour sur l'aisieu duquel tournent les roues qui sont cause du mouvement, est reculé de l'assemblage qui porte les pilons, afin que la grande roue ait son libre mouvement. Ici ie declareray ce qui se void en la figure. car estant entendu, chacun à son vouloir y pourra adiouter ce qui luy semblera bon, comme dit la proposition. En l'aisieu donc des roues il-y-a quatre chevilles, d'autant qu'il-y-a quatre pilons, lesquelles chevilles sont ainsi disposees que si l'axe estoit à quatre pans, & que de chacun il sortist vne cheville. Et ceci est fait afin qu'avec l'utilité l'oreille ne soit point faschee d'ouïr un bruit discordant. Ce qu'observent mesmes les batteurs en grange, combien qu'ils soyent rustiques, & les mareschaux, tant afin que la symphonie soit agreable, que afin que la concurrence ne les empesche de frapper, laquelle en cest endroit nuïroit beaucoup. car si deux pilons venoyent à estre leuez ensemble, la force s'amoindriroit: & si ils n'estoyent leuez par mesure egale, mesme force ne seroit pas au leuer aux vns comme aux autres: car celui qui attendroit plus à estre leué tomberoit plus violement que celui qui ne mettroit pas tant de temps. Or ces chevilles en attrappent d'autres qui sont à autant de pieces de bois, qui ont libre mouvement sur un petit axe, & sont faites en fourche par le bout où elles empoignent les pilons auxquels elles sont attachees avec vne cheville, ayans cependant libre mouvement. Cela ainsi fait, & les pilons posez en tel assemblage qu'ils se voyent en la figure, le mouvement estant cause par la force d'un homme qui pousse par haut, & d'un autre qui pousse par bas, la machine fait ce à quoy elle est preparee.

PROPOSIT. XXVI.

Nouvelle forme de moulin, par laquelle avec peu d'hommes, lon pourra mouldre autant de bled qu'avec deux autres communs, soit à eau, soit à vent.

DECLARAT. DE LA XXVI. FIGURE.

LA multiplication a grande efficace aux mouvemens, & principalement quand le mouvement d'une petite roue est communiqué à vne grande roue. ce que nous verrons en ce double moulin, duquel ie veux declarer toutes les parties devant l'usage. Loignant la ligne de midi est un tour qui a deux roues en dehors: l'une vers orient, & l'autre vers occident, sur un mesme axe, au milieu duquel est un barillet loing de la ligne de midi, de 1.m. & de la ligne d'orient 1.m. 7.p. Outre sur le mesme plan loing de la ligne de midi environ 1.m. 8.p. est le support du moulin, ou est un autre tour mouvant es pieces qui portent le moulin. & est l'axe dudit tour parallele à la ligne de midi, & loing de

Declaration

la dicte ligne d'environ 1.m.8.p. & d'orient son bout qui en est le plus pres, 14.p. & d'occident l'autre, de 12. Au milieu de cest axe est vne grande roue d'ou depet toute la force du mouuement, de laquelle le moyen est loing de la ligne de midi 2.m.8.p. & d'occident 1.m.14.p. Au bout de l'axe en dehors est vers orient vne roue telle que les deux deuant dictes, & au bout vers occident aussi vne de mesme. Ces tours avec leurs roues sont menez par homes qui meinent les signoles, come il a esté dict cideuant. Dauantage loing de la ligne de midi 2.m.14.p. & loing de celle d'occident 1.m. est vn pignon à lanterne, come à mesme distace de midi: & loing d'orient 1.m. aussi est vn autre. Et en l'axe du second tour sont deux roues dentees, desquelles l'une a son milieu loing d'orient 1.m.6.p. & l'autre d'occident 1.m.3.p. & demie, fixes audict axe, & faisant tourner les pignons au bout des arbres desquels sont attachez les meules qui tournent come eux: leurs arbres ayas des puiots vers midi tournas sur les pieds, qui sont loing l'un de la ligne d'orient 1.m. & l'autre de la ligne d'occident, 1.m. aussi. les dicts pieds sont faicts en treteaux, afin que l'aissieu passe par dessus les pieces de dessus. Cela ainsi faict & entendu, le mouuement sera aisé à comprendre: qui se fait par le moye d'une chaine qui enuironne le barrillet qui est au premier tour, & la grande roue (come on void la corde es rouets des femmes estre entour la roue & le moyen) & puis par la force des homes qui meinent les tours. Or que ce mouuement ne soit vehement, il appert: car le barrillet tournant & donnant branle à la grande roue à cause qu'il est petit, fait que la roue a bien plus de branle tant pour sa pesanteur que sa grandeur. Car le mouuement estant ainsi donné, tout se meut. Ce qui est le but de ceste machine.

P R O P O S I T. XXVII.

Ceste forme de moulin à bras par laquelle sans la force ni du vent ni de l'eau courante, deux hommes bien aisement rendront autant de farine de bled que par l'eau ou vent le moulin posé en lieu à ce requis.

DECLARAT. DE LA XXVII. FIGURE

CE que l'autre moulin double a faict par quatre hommes, ce simple le fait par deux. Et quant à ce que l'auteur met ici ces deux figures, l'une à deux moulins & l'autre à vn, il le fait pour monstrer que lon en peut faire d'une & d'autre sorte des doubles, & triples, & quadruples, & simples: mais laissant cela à la discretion du diligent ouurier, ie declareray les parties de cestui-ci.

Premierement on void trois doubles solines paralleles à la ligne de midi. Les premieres sont loing de la ligne de midi de 23.p. les secondes, de 1.m.16.p. les troisiemes, de 3.m.9.p. Sur celles-ci est appuyé le corps du moulin, & desquelles viennent deux pieces de bois, loignes de 14.parts, l'une loing de la ligne d'orient de 19.p. & l'autre de la ligne d'occident, de 1.m.10.p. En icelles vers le bas qui regarde midi, est vn axe parallele à la dicte ligne de midi, au bout oriental, duquel est vne roue loing de la ligne d'orient de 13.p. come au bout occidental vne autre semblable loing de la ligne d'occident 1.m.2.p. Ces deux sont egales & paralleles, & sont menees come les deuant dictes aux autres machines: & sont les premieres la cause du mouuement. Au milieu de l'axe (lequel milieu est loing de la ligne d'occident de 1.m.21.p.) sont deux bois courbes par les deux bouts: lesquels s'etrecroisent, & croisent aussi à angles droits l'aissieu. Outre plus des mesmes doubles solines loing de la ligne d'occident de 1.m.15.p. paroist vne piece quarree fixe à icelles, au milieu de laquelle est vn axe qui tient à la meule, lequel tournant la fait tourner, & finit loing de la ligne de midi 2.m.17.p. & d'occident 1.m.15.p. Au dessus de ce point qui est sa fin, enuiron 2.m. est le moyen d'un assemblage de roues faict en cone, ou pyramide ronde, duquel la base se ioint quasi aux secondes doubles solines. & est ceste base la grande roue, qui est cause de la force du mouuement, outre laquelle il y en a deux autres petites iointes à elle par rayons, lesquelles en fin se viennent rendre au susdict moyen, les roues s'appetissans selon la nature du cone. Ce moyen la avec tout l'axe que nous auons dist, est souste nu par le bout de ceste vis apparente, qui entre dans le bout de l'axe comme vn puiot en son trou. Ce qu'on peut voir es deuidetz dont les femmes vsent à deuider leur fil. Et quant à ceste vis, elle est afin de supporter le faix de la meule, & pour la leuer ou baisser. Or à la plus petite des roues sont des estouteaux, lesquels (par le moyen des roues paralleles estans menez) les bastons en croix rencontrent, de sorte que peu à peu prend branle la grande roue, qui puis apres est aidee par les dicts bastons qui luy ont donné branle. Quant au reste, c'est l'escalier & la barre de fer, contre laquelle on s'appuye pour monter & porter le bled au moulin.

PROPO-

Des figures de ce Theatre.

PROPOSIT. XXVIII.

Nouvelle maniere de faire vn moulin à eau qui puisse estre en vsage à plusieurs, nonobstant qu'il-y-ait moins d'eau que ce qui est necessaire aux moulins communs, pourueu qu'elle tombe d'un lieu vn peu penchant.

DECLARAT. DE LA XXVIII. FIGVRE.

*C*E moulin ci est tiré du precedent, sa meule estant en mesme arbre que la roue. Or quant à ceste facon, encores qu'elle soit incognue à plusieurs, elle est vulgaire en quelques lieux, & principalement à Tholoze, & autre part, en quelques vilages, où i'en ay veu: toutesfois nostre auteur l'a enrichi de ce que les ailes de la roue vont en rond. Ceste roue est en la figure parallele à la ligne de midi, & loing d'icelle d'environ 1.m. 7.p. l'eau venant de la partie d'orient, encores qu'aux machines on la face venir d'où on peut, estant tout vn d'où elle vienne. Et ie di ceci afin qu'aucuns ne pensent qu'il soit necessaire qu'elle vienne d'orient. Quant à la commodité de ceste machine, elle est telle qu'il ne faut pas tant d'eau qu'aux moulins communs, & qu'auſſi elle ne couste pas tant à faire: tant à cause de la roue que l'eau fait mouuoir, que pour les roues dentees & pignons qui n'y sont pas, comme es vulgaires.

PROPOSIT. XXIX.

Nouvelle facon d'instrument de musique, duquel les cordes estans de metal, & touchees de l'archet & des doigts, rendent vn son fort plaisant, & à plusieurs parties note contre note, lequel son participe ensemblement à celuy du violon, ou lyre, ou clairon.

DECLARAT. DE LA XXIX. FIGVRE.

*I*E ne te diray rien de cest instrument, d'autant qu'il y defaut quelques choses, n'ayant pas esté acheué, mais mis ici par l'auteur pour monstrer qu'il estoit de son inuention. parquoy ie te le laisse, attendant que quelqu'un y mette la derniere main.

PROPOSIT. XXX.

Artifice nul lepart encores recognu, par lequel avec peu d'ouuriers on peut trainer & charrier des perrieres tous grands & incroyables fardeaux d'obelisques & colonnes, pour la beauté & perpetuité de tous edifices royaux & somptueux.

DECLARAT. DE LA XXX. FIGVRE.

*L*E consentement & commun accord des tours multiplie beaucoup leur force, voire tellement que du double on vient au centuple, par le moyen de quelque multiplication: ce qui s'entendra par la declaration de ceste machine.

La piece ou fardeau à trainer est ce chapiteau qui est loing de la ligne de septentrion 22. p. & de la ligne d'orient 15. p. lequel est porté sur vn traineau qui est posé sur trois rouleaux, lesquels tournent sur puiots qui entrent es pieces de fer qui viennent du traineau. Et ceci est fait afin qu'il ne faille point changer de rouleaux. Audiect traineau y-a vn tour que meinent deux hommes, loing de la ligne de septentrion 1.m. 18.p. & de la ligne d'orient 1.m. En la ligne de midi est vn autre tour mené par deux hommes, lequel est sur vn traineau qui s'arreste contre terre par ces bois qui viennent en biais. Puis loing de la ligne de midi 1.m. 5.p. est encor vn autre tour, qui est sur vn pareil traineau que le precedent: les rouleaux d'iceux tous estans comme celuy qui porte le chapiteau. En ces deux der-

Declaration

niers tiennent les cordes, qui venans de celuy qui est en la ligne de midi, vont s'entortiller au tour qui est au traineau du chapiteau, ne faisant que trois tours en iceluy, puis venans au tour qui est plus septentrional. Les cordes ainsi disposées, il aduient que quand le premier tour qui est en la ligne de midi tourne, il tire à soy estant immobile le chapiteau au prix qu'il deuide les cordes, & l'autre tire aussi à soy le mesme. par ainsi les deux le tirent, & leur force est multipliee par le tour qui est au traineau du chapiteau. car estant tourné, il tire à soy le premier tour qui est fixe, qui aussi le tire à soy: dont s'ensuit que le mouuement est tres-violent. Puis apres l'autre tour tire à soy le chapiteau auquel est le premier tour: ou bien se peut faire au contraire, faisant que le tour du traineau tire le petit. Ceste facon de tirer rend telle force aux tours que peu de personnes font ce que plusieurs difficilement feroient. L'experience peut monstrier la facilité & gentillesse de la chose.

PROPOSIT. XXXI.

Facon nouuelle pour charger & charrier en chariots, grands & pesans fardeaux, tirez par lieux accessibles. Et ores que cela ne se face si hastiuement que de coustume, on espargnera neantmoins par tel moyen beaucoup de despenses tant d'hommes que de cheuaux.

DECLARAT. DE LA XXXI. FIGVRE.

C E U X qui scauent quelle force est cachee en la moufle des architectes, entendront bien quelle sera la force de ceste machine à leuer le fardeau, & entendans ce que j'ay dict en la precedente, s'asseureront de la certitude de ceste machine, en ce qui appartient à tirer ce fardeau: lesquelles deux choses sont à considerer. En ceste machine donc se presente premierement un instrument que nos artisans appellent vne grue, qui est cest assemblage de quatre chantiers, qui allans d'orient en occident, sont ioints par le moyen d'une cheuille vers occident, en la part qui est esloignee de la ligne de midi, d'environ 1.m.15.p. & de la ligne d'occident 8.p. les deux pieds qui se voyent estans longs de 2.m.14.p. tous quatre toutesfois s'eslargissant par embas en quarré: de sorte qu'ils constituent vne pyramide à quatre pans. Du haut de ceste cheure, pour leuer l'instrument (ce que nous declarerons le premier) pend vne chaine, de laquelle la fin est loing de la ligne de midi 1.m.14.p. & demie: & de la ligne d'occident 23.p. De là pend vne pyramide à quatre pans, de laquelle la base est parallele à la terre. Puis au point loing de la ligne de midi autant, & d'occident 1.m.19.p. est la pointe d'une autre petite pyramide toute pareille: ayans ces deux la base opposée à la base l'une de l'autre. En toutes deux y-a beaucoup de poulies, en celle de dessus treize, & en celle de dessous douze, qui y sont constituées ainsi. A la pyramide d'enhaut il pend de la pointe vne croix, qui à chaque bout a vne poulie: ainsi sont desia quatre: & du milieu de la croix en pend vne autre. De chaque angle puis apres en pendent deux: l'une du milieu, & l'autre du bas. Autant y-a-il en celle d'embas, fors qu'elle n'en a point au milieu de sa croix. Vne corde environne ces poulies, estant attachee à un anneau, qui est en un des chantiers du pied de cheure, loing de la ligne de midi 1.m.8.p. & de la ligne d'occident 1.m.13.p. Puis de toutes les poulies se vient rendre au tour qui est aux deux iambes de dela du pied de cheure, loing de la ligne d'occident 1.m.18.p. au bout duquel est cest instrument, qui se nomme la vis sans fin, duquel le pourtrait est en la 39. figure depeint au vuide vers l'angle d'occident & de septentrion, auquel il y-a telle force de tirer qu'elle est incroyable. Or la corde environne les poulies de ceste facon qu'on peut voir en ce pourtrait, qui est ici à costé vers la ligne d'occident, venant de la boucle à celle qui est en un angle de la base de la pyramide d'enhaut, d'elle à l'une de celles qui est à la croix de celle d'embas: de ceste la en l'une qui est au milieu d'un angle de la mesme pyramide: de là va à vne qui est en mesme constitution en l'autre pyramide, de laquelle elle va en l'une de celle qui est à un bout de la croix: de ceste la vient à celle qui est au bout de l'angle de la pyramide d'embas, duquel angle elle est venue: de là va à vne autre de celles des bouts de la croix de la pyramide d'enhaut, & puis à vne qui est au milieu de l'angle de ladicte pyramide, lequel angle est composé en mesme pan que l'autre, ainsi consequemment allant vient en fin en la pyramide de dessus, à la poulie qui est au centre de la croix: d'où puis apres elle se deuide autour du tour, lequel la tirant, luy baille grande force à leuer le fardeau qui tient aux crochets, qui pendent de la pointe de la pyramide d'embas. Le fardeau leué, il est question de le trainer.

Pour trainer le fardeau, il a esté posé sur un char à quatre roues, par le moyen des engins susdicts, lesquels ostez on met peine de trainer ledict fardeau: pour quoy faire, il y-a un tour au bout meridional, ou queue du char à quatre roues:

Des figures de ce Theatre.

roues: duquel tour le milieu est loing de l'angle de midi & orient 1.m.8.p. & de la ligne de midi 12.p. Entour cestui-ci se deuident les cordes qui viennent des autres chars à deux roues: dont l'un est en la ligne de septentrion, & l'autre en est 1.m.16.p. loing. Et n'ont que faire d'auoir plusieurs roues que deux: car ils ne portent rien. Au reste vn cheual est mis à chacun pour le trainer. Or le char a à sa queue vn tel instrument que celuy qui se void au vuide en la figure vers l'angle d'occident & de septentrion, afin qu'il ne puisse reculer. De ces chars celuy qui est en la ligne de septentrion va tousiours deuant, & duquel les cordes passent par dessus le second: & celles du second passent comme celles du premier par dessus le deuant du grand char, où il paroist de petits rouleaux, afin que la corde y touchant ne s'arreste, & ne s'vse. Ainsi tout disposé, quand le premier char tire, le tour luy aide, & tire à soy le second char, qui de son costé tire tant qu'il peut: de sorte que violement le fardeau est porté. Mais quand la corde est trop courte du second petit char au grand, lors il faut qu'il face ce que faisoit le premier, le tour luy aidant, comme parauant il auoit fait à l'autre. Et ainsi faisant tousiours, le fardeau sera trainé (quelque pesant qu'il soit) avec trois cheuaux. car vn cheual tire le grand char, qui apporte grande force au trainement. Ce que l'experience verifera, & monstrera estre certain.

P R O P O S I T. XXXII.

Nouveau genre d'artifice propre à porter les marchandises, & trainer contremont les bateaux de riuere, avec peu de cheuaux & despens, es lieux & temps, lors principalement que nul vent ne leur peut aider.

DECLARAT. DE LA XXXII. FIGURE.

*L*A raison de ce mouuement n'est que reiteration de ce qui a esté dict es precedentes declarations, l'auteur monstrant par ceci en combien de maniere on peut se seruir du commun accord des tours.

Le bateau chargé est ce grand qui est en la ligne de midi, lequel deux autres moindres & vuides tirent: dont l'un qui est le plus grand des petits, est vers septentrion, l'autre moindre est entre les deux. En celuy qui est vers septentrion est vn tour double, qui a grande force de tirer, comme il a esté dict, duquel la corde se va rendre au haut du mas du chargé à vne boucle qui y est, & de là vient au bas vers deux ouuriers loing de la ligne de midi 5.p. & de la ligne d'occident 1.m.12.p. En l'autre bateau y a vn tour tout pareil, duquel la corde vient au mas en la boucle loing de la ligne de midi 7.p. & de la ligne d'occident 22.p. & vient se rendre en la mesme partie que l'autre, là où elle s'attache d'un neud libre. Car quand les tours sont pleins, ceux qui sont dedans le nauire chargé tirent les cordes, afin que cependant que les cheuaux tireront les autres, il ne recule point. Les cheuaux qui tirent le bateau septentrional sont en la ligne de septentrion, & ceux qui tirent l'autre, sont sur le bord vers orient, loing de septentrion 2.m. Ce qui est aisé à experimenter.

P R O P O S I T. XXXIII.

Artifice non vulgaire pour labourer la terre avec grand abregement, scauoir est à trois focz à la foix, & avec deux cordes attachees à la charrue, se plians & replians ou au dessus de la charrue, ou au bout du champ.

DECLARAT. DE LA XXXIII. FIGURE.

*E*N C O R E S est ici ramenee la raison susdicte, qui se peut accommoder en plusieurs sortes: mais i'expliqueray ce qui est en ceste figure.

Aux deux bouts du champ sont deux tours par terre, l'un en midi, & l'autre en septentrion: lesquels sont arrestez par le moyen de deux pieces qui les tiennent contre terre en biais, de facon qu'ils sont comme deux pieds de cheure. A leurs tours s'accrochent les cordes qui se vont entortiller au tour qui est au deuant de la charrue qui apparoit au milieu de la figure, le milieu dudit tour étant loing de la ligne de midi 2.m.21.p. & d'orient 1.m.6.p. Les cordes viennent du tour meridional, & se deuident autour du tour qui est en la charrue, y faisant trois ou quatre tours: & puis

D. ij.

Declaration

se vont rendre au tour septentrional. Parquoy lors qu'il aduient que les ouuriers tournent, le tour de la charrue tire contre l'un & l'autre tour des bouts: de sorte que c'est comme si l'un & l'autre tiroit à soy la charrue, l'un par dessus, & l'autre par dessous. En fin la charrue vienne au point de tourner, on porte les bouts des cordes qui sont en midi au tour de septentrion, & au contraire: ou bien le tour de la charrue tourne sur icelle à pinot, de sorte que le tour ne change point, mais seulement la charrue tourne. Or il est clair que ceste maniere de tour aide fort aux bœufs qui tirent la charrue, à la queue de laquelle il-y-a trois socs. On pourroit faire ceci plus fort, en mettât des cordes infinies aux tours, lesquelles se deuideroyent alentour du tour de la charrue. car lors la force se quadrupleroit. Le diligent ouurier pourra par ce qui a esté dict inuenter infinies autres manieres, aidé par ces inuentions ici.

PROPOSIT. XXXIII.

Artifice nouveau & compendieux, auquel vne roue tournant tousiours en mesme endroit, meine & rameine auant & arriere vne poultre pour calendrer la toile à la facon du camelot à vndes.

DECLARAT. DE LA XXXIII. FIGURE.

La declaration des parties donnera à entendre ce qui est de beau & remarquable en ceste machine. La poultre qui doit estre menee & ramenee est vers septentrion, soustenue entre quatre pieces de bois, qui loing de leur bout oriental 9. p. ont chacune vne poulie. Entour desquelles il-y-a des cordes qui se viennent attacher à la partie septentrionale de la poultre, de sorte que les cordes venans des poulies septentrionales tirent à soy la poultre, laquelle a vers midi, comme vers septentrion, deux boucles, ou il-y-a deux cordes qui la tirent vers midi, & ces cordes ne passent point par les poulies. Or le mouuement de la poultre est causé par le rouage qui est vers midi ainsi constitué.

Au bout oriental de l'arbre qui va d'orient en occident est vne roue dentee, de laquelle le milieu est loing de la ligne de midi 1. m. & de la ligne d'orient 23. p. laquelle meine deux pignons à lanterne, qui ont leur arbre sur les pieds qui soustiennent l'arbre de la roue, un desdicts pignons étant loing de la ligne de midi 21. p. & de la ligne d'orient 13. p. ayant pres soy en mesme arbre un barrillet, autour duquel se deuide vne corde: & l'autre pignon loing des mesmes lignes 1. m. 5. p. & 1. m. ayant aussi pres soy pour la mesme fin un barrillet. Au dessus est un autre arbre parallele à cestuy-ci, ou il-y-a deux barrillets faicts à la mesme fin que les premiers. Outre ceci il-y-a vne roue detee au milieu de chaque arbre, faicte en sorte que l'une meut l'autre. Par ainsi est faict le mouuement promis. car les cordes qui tiennēt en la partie septentrionale de la poultre s'entortillent aux barrillets de dessous: & celles qui tiennent à la partie meridionale, s'entortillent aux barrillets de dessus d'autre facon qu'aux barrillets de dessous, & tiennēt les cordes en iceux barrillets. de la viēt que quād la grande roue tourne, les barrillets de dessus tournent: & la roue qui est en leur arbre fait tourner les autres au rebours. Par ainsi quād les uns la schent, les autres tirent, & au contraire. Puis quād la corde est toute deuidee, elle se re deuide au mesme barrillet, & au contraire qu' auparauant. Par ainsi se fait un autre mouuement que le premier: mais cela aduient seulement vne fois en un tour de la grande roue, durant lequel la poultre va & vient vne fois: qui est causé que de tour à tour faut faire changer de tournoyement au cheual.

PROPOSIT. XXXV.

Nouvelle facon bien necessaire, avec laquelle sans eschelle ni pont on administre promptement autant de pierres & mortier que plusieurs massons peuuent employer en la fabrique ou reparation d'une haute & large muraille.

DECLARAT. DE LA XXXV. FIGURE.

TOUTE la force & singularité de ceste machine est en la grande roue, suyuant la raison qui en a esté cideuant alleguee. Or ses parties sont telles. Vers midi loing de la ligne de midi 7. p. & loing d'orient 1. m. 11. p. & d'occidet 12. p. est un tour par terre tel que ceux dont les massons vsent. Un peu par dela est un autre tour plus grand, ayant la grande roue, dont il est questio, sur l'axe long de 2. m. 7. p. le moyen de ladicte roue estant loing de la ligne de midi 1. m. 11. p. & de

Des figures de ce Theatre.

Et de la ligne d'occident 1.m.15.p. ledict axe tournât sur les pieds qui cōposent ce tour-ci. Vers orient il-y-a vn barrillet au bout de l'axe, comme aussi vers occident, ayant chacun entour soy vne corde qui y tient. Ainsi la corde du barrillet d'orient va se rendre à la poulie qui est vers septentrion, loing de la ligne de septentrion 1.m.2.p. Et de la ligne d'orient 15.p. par dessus laquelle tournant, se doit venir rendre iusques à terre pour estre attachee à vn baston qui se monstre en la figure esleué vers septentrion, loing de la ligne de septentrion 1.m.16.p. Et du barrillet d'occident la corde toute pareille à ceste-ci, va en la poulie qui est loing de la ligne de septentrion 1.m.2.p. Et d'occident 19.p. se venant rendre au baston comme l'autre, auquel il-y-a trois seaux & trois paniers pour porter le mortier & les pierres. Cela ainsi entendu, il faut venir au mouvement qui se cause par le moyen de celui qui meine la signole du petit tour, autour duquel est vne corde qui sur luy se deuide d'autour la grande roue qui donne le branle, & fait tourner les cordes entour les barrillers, si que le baston monte à haut, les deux tours estans bien attachéz avec crampons contre terre, afin que le poix ne les enleue. Or quant tout est enleué, celui qui paroist aupres du petit tour, tire la corde qu'il tient, qui est deuidee en la grande roue, de laquelle vn bout tient au milieu du baston, qui par ce moyen est tiré à bas.

P R O P O S I T. XXXVI.

Machine recente & nouuelle, faicte par la balance, à l'aide de laquelle on descharge aisement les bateaux qui sont venus à port, pleins d'eau douce, ou d'autres telles choses.

D E C L A R A T. D E L A XXXVI FIGVRE.

CESTE machine est soustenue sur terre, & doit tourner sur vn pinot comme les moulins à vent, afin qu'on la puisse virer de toutes parts. Sa base est vn plancher qui est loing de la ligne de midi 14.p. d'une part, & 1.m.3.p. de l'autre: de la ligne d'orient 1.m. Et de la ligne d'occident autant: ce bois qui tire vers occident seruant à la faire tourner sur son pinot. Aux quatre coings du plancher, il-y-a quatre pieces de bois releuees sur iceluy à angles droits, qui en supportent deux autres se croisans par le milieu, afin qu'il y soit mis vne piece de bois creuse & ronde, où ceste vis qui tire de midi en septentrion puisse tourner. Ceste partie est loing de la ligne de midi 1.m.13.p. Et de la ligne d'orient 1.m.15.p. De deux des quatre pieces qui tiennent au plancher, de deux di-ie diametralement opposees s'esleuent deux colonnes vers septentrion, sur lesquelles est vn trauerfier, au milieu duquel est le trou dans lequel tourne le pinot de la vis, & est ce trou loing de la ligne de septentrion 1.m.19.p. audessous duquel est en la vis vne piece où tiennent à pinot deux bois composans la balance qui tire de l'angle d'orient & de septentrion à l'angle d'occident & de midi, longue de 3.m.6.p. de chaque bout, de laquelle pend vn seau, qui est esleué ou baissé par le moyen de l'escroüe qui est en la vis: en laquelle escroüe tiennent deux arcs, au bout desquels passent les deux pieces qui font la balance. Or d'autant que ces deux arcs vont plus haut que le lieu où ils tiennent en l'escroüe, il est euident que par le hausser & baisser de la-dicte escroüe la balance hausse & baisse, estant tenue en raison par les deux colonnes qui passent à trauers elle, hausant beaucoup à cause que les bouts des arcs vont plus haut que leur commencement qui est en l'escroüe. Le reste est facile à entendre par la figure.

P R O P O S I T. XXXVII.

Nouuelle facon de composer (par le ministere de la vis & balance) vn artifice conuenable à descharger tous les plus grands bateaux ou nauires conduits à port, des plus massifs, pesans & grands fardeaux qu'elles puissent porter.

D E C L A R A T. D E L A XXXVII FIGVRE.

LA vertu de la balance est telle qu'à l'aide d'un poix on peut leuer vn gros fardeau, ce qui se peut beaucoup plus aisement faire par l'aide de la vis, de la force de laquelle nous auons desia parlé. Parquoy pour l'intelligence de ceste machine, venons aux parties, desquelles la facon se cognoist par ce qui est pourtrait en la figure.

D. ij.

Declaration

Toute la machine est assemblée à terre, & peut tourner sur un pivot comme celle de deuant, sa balance estant de ces deux pieces de bois assemblees qui tournent sur le bout du cylindre qui apparoit loing de la ligne de septentrion 2.m.2. p. & de la ligne d'occident 1.m.15. p. est la balance longue de 3.m. 11. p. le reste pouuant tourner autour du cylindre qui est au milieu. En la partie orientale de la balance, il-y-a des chaines desquelles est lié le fardeau: en l'autre est une escroue qui tourne sur des pinots, afin que la vis puisse librement entrer en elle, laquelle est attachee au barillet qui est loing de la ligne de septentrion 2.m.21. p. & d'occident 12. p. pouuant remuer rondement en iceluy, qui aussi tourne sur deux pinots: en ces deux pieces de bois qui sont attachees à l'assemblage de la machine, & qui sont eslongnees de la ligne de midi 2.m.6. p. Cela entendu, si un homme n'est assez pour leuer le fardeau, on adiousterà des poix à la chaine qui vient de la partie de la balance qui est vers occident.

PROPOSIT. XXXVIII.

Autre machine nouvelle (fondée principalement sur la vis) pour descharger toutes sortes de nauires arriuees à un port, & chargees de colonnes, ou autres semblables pesanteurs.

DECLARAT. DE LA XXXVIII. FIGURE.

CESTE machine est soutenue sur un pivot comme les precedentes, & est remuee sur iceluy par le baston qui vient du milieu de sa base, & qui tend vers l'angle de septentrion & occident. Elle ressemble fort aux grues communes desquelles usent les massons pour leuer leurs pierres, ayant seulement de different une vis au milieu, alentour de laquelle tourne l'escroue qui se voit loing de la ligne de midi 3. m. estant tenue en raison par les renures qui sont aux pieces de bois aupres de la vis. En ceste escroue il-y-a une corde ou chaine qui vient à la poulie occidentale, & de là au fardeau, qui est leué en haut par la force de deux hommes qui font tourner la vis. Ce qui est aisé.

PROPOSIT. XXXIX.

Machine nouvelle & propre, pour avec peu d'ouuriers & despens, tirer & monter la terre d'un fossé au dedans des murailles d'une place, pour icelle remparer & fortifier.

DECLARAT. DE LA XXXIX. FIGURE.

ON ne peut quasi dire quelle est la force de ceste machine, veu que par son moyen six hommes font autant que trente, toute sa force estant en la vis sans fin, & en l'autre rouet qui est peint vers l'angle d'occident & de septentrion. Il-y-a deux grands chevrons appuyez contre ceste muraille qui apparoit, desquels la facon & l'appuy est aisé d'entendre par la figure, leur grandeur y estant de 3.m.3. p. Au bout septentrional d'iceux est la vis sans fin, de laquelle la figure est au vuide vers l'angle de septentrion & d'occident, estant ioint avec le rouet susdict: & est loing de la ligne de midi 3.m. & de la ligne d'occident 1.m.11. p. le mesme rouet estant au pied vers septentrion, qui est mené par un homme seul, comme la vis sans fin. Entour ces deux tours est une chaine infinie, faicte comme elle est peinte au rouet avec ses bastons, où sont attachees les hortes d'un costé & d'autre, qui sont portees à mont par la force de la vis sans fin & des roues.

PROPOSIT. XL.

Artifice pour esmouuoir de son assiete droite, & puis trainer (le tout avec assurance & peu de frais) où on voudra, & aussi adresser en lieu bien ferme, toute grosse & haute colonne, ou obelisque.

DECLARAT. DE LA XL. FIGURE.

IE PENSE que l'inuention & industrie de ceste machine n'apportera pas moins de prouffit que de plaisir,

Des figures de ce Theatre.

plaisir, ven qu'elle est souvent desirée par les artisans qui ne l'ont pas. car l'industrie en est telle que ce qui est porté & soulevé l'est aussi doucement comme par eau. Mais afin de bien entendre ce qui en est, venons aux parties & à leur usage.

Nostre auteur a mis ici pour exemple cest obelisque, qui est loing de la ligne de septentrion 2.m.9.p. & haut de 2.m.10.p. lequel est levé par les instrumens que nous dirons, afin puis apres d'estre tiré par les autres. Vers septentrion il-y-a deux assemblages de bois bien attachez à terre, & tenus en raison avec des cordes, estans esloignez l'un de l'autre de telle espace que ces deux grandes pieces de bois y puissent passer: lesquelles pieces vont de l'angle de septentrion & d'orient vers l'angle d'occident & de midi, ayans en longueur 3.m.14.p. Au bout occidental desquelles pend l'obelisque qui est levé par le moyen de la balance telle qu'il sera dict tantost, & leur autre bout est à terre estant tiré par les cordes qui sont en l'un & l'autre, & qui se rendent en vne qui s'entortille autour le tour où est la vis sans fin, loing de la ligne d'orient 13.p. & de septentrion 19.p. D'avantage il-y-a vne machine faite en triangle scalene rectangle, au plus grand costé de laquelle est vne piece de bois qui se hausse ou baisse selon que lon met les chenilles: & apparait ladiete piece loing de la ligne de midi 2.m.22.p. & d'orient 14.p. dessus icelle s'appuye la balance, de laquelle vne part est en l'obelisque au point loing de la ligne de midi 2.m.22.p. & d'orient 18.p. ayant la balance en son autre partie des poix & des cordes, & estant tenue en raison par l'assemblage qui est loing de la ligne de midi 1.m.13.p. qui est fait en facon de guindal. Ceste balance est aidée par ces hommes qui soulevent l'obelisque, & par ceux qui tirent les cordes du bout meridional d'icelle. Or estant ainsi l'obelisque levé, il est tiré par des tours, où y-a des vis sans fin, lesquels sont vers midi en cest edifice qui y paroist, & d'où viennent les cordes qui se voyent vers occident quasi paralleles à la ligne d'orient. Le reste est assez aisé de soy mesme.

P R O P O S I T. X L I.

Nouvelle & certaine inuention pour maïsonner, es maisons mesmes qui soyent basses, & environnées d'empeschemens, cheminees, desquelles & les rayons du soleil & le souffler des vents sont tellement forclos, que nul ne peut estre offensé de fumees dans les chambres.

D E C L A R A T. D E L A X L I. F I G V R E.

L'UTILITE de ceste inuention est telle qu'elle est desirée souvent pour la commodité des chambres où on fait le feu, qui en beaucoup de lieux fument si fort, à cause des vents & du soleil, que cela fasche les demeurans. Parquoy on sera hors de ceste peine si on fait la cheminee comme ceste-ci qui est peinte en la figure sous le soleil qui y est peint vers septentrion. Mais à cause qu'elle est si obscurément peinte, ie declareray à l'auenture le sens de l'auteur, ma declaration toutesfois estant fondée en raison. Il faut donc noter qu'il est nécessaire de faire le canal de la cheminee moyennement haut, en la ville principalement, afin que sa hauteur passe celle des maisons voisines, en laquelle soyent (icelle estant quarree) plusieurs fentes allans en angles, comme on les voit en la figure qui est loing de la ligne de midi 2.m. & demie: & d'occident 1.m. & demie. & ne faut pas que les ouuertures d'un costé soyent vis à vis de celles de l'autre costé: mais il faut qu'une ouuerture soit opposée à la paroy, & ainsi de toutes, la bouche d'en haut ayant un bord alentour, afin qu'elle ne soit aupres du haut toute emplie des rayons du soleil. Cela ainsi constitué, la fumee trouuera tousiours place pour sortir, sinon que tous les vents ventassent à la fois. ce qui ne se peut faire.

P R O P O S I T. X L I I.

Nouvelle industrie de faire vn pulpitre, auquel estans appliquez deux miroirs, l'un à l'opposite de l'autre, les formes des lettres reuerberées de tous deux, & augmentées par l'un qui est concaue, on lit bien aisement en vn liure, au grand soulagement de la veue.

Declaration

DECLARAT. DE LA XLII. FIGVRE.

La subtilité de ceste inuention n'est moins gentille que proufitable. car par la refluxion du rayon d'un miroir à l'autre, on void dans vn miroir ce que l'autre regarde, & par ainsi la veue n'est point offensee. Car on ne lit que dedans le verre: & est besoin d'auoir vn miroir qui rende gros ce qui se void dedans. Or le pulpitre est tel.

Ce qui se void vers septentrion est le pulpitre entier & accompli de ses pieces qui sont vers midi. Ceste vis qui est la plus prochaine de la ligne de midi est le pied: & ceste partie qui est entre deux & tend vers occident est le pulpitre, qui a deux parties: celle d'en haut pour soustenir le liure, & celle d'embas, pour soustenir vn miroir posé en mesme plan que le liure. Au bas vers orient est vn autre miroir concaue, ou plat (s'il ne s'en trouue de concaue) qui se met par dessus le liure, & le regarde, estant soustenu par ces deux regles fourchues qui paroissent à ses costez, comme on peut voir au pulpitre assemblé, par le moyen duquel on lit dans le verre. car les lettres se iettent au rebours dans le miroir de dessus, qui les reiecte à droit dans le miroir de dessous, où elles se voyent. Qui est l'usage de ceste inuention.

PROPOSIT. XLIII.

Nouvelle inuention non à mespriser, par laquelle d'un puis bien profond, sans tuyaux, on peut tirer (avec doubles cordes & poulies) l'eau, de telle facon que celuy qui tourne, ne sent que la moitié de la pesanteur de l'eau & du seau.

DECLARAT. DE LA XLIII. FIGVRE.

La force de la moufle des massons entendue, celle de ceste inuention sera euidente, & se cognoistra par la deduction des parties, qui sont telles.

La gueule du puis se void quasi au milieu de la page tirant vers midi, au dessus de laquelle est vn assemblage de quatre piliers soustenans la couuerture, & l'aisieu de la roue étant quasi comme les communs, & ayant mesme usage, horsmis que lon tire par le moyen du reste vn seau tenant trois ou quatre fois autant que les communs, & ce par l'aide de la piece où sont deux poulies, qui se void au fond du puis, & d'où pend le seau, & du retournement des cordes en haut à deux autres poulies paralleles à celles qui sont en vne piece de bois parallele à l'aisieu de la roue, auquel est la corde qui est ainsi mise. Un bout d'icelle est en l'aisieu, puis vient à la poulie orientale d'embas, de laquelle elle vient à l'orientale d'en haut, de laquelle elle va à l'occidentale d'en haut, de laquelle elle va à l'occidentale d'embas, de laquelle elle va au lieu d'où elle commence: qui est la cause que lors que la roue tourne, le seau est leué, les deux poulies estans tirees par la corde par laquelle elles sont soustenues. Ce qui est aisé tant à voir qu'à practiquer.

PROPOSIT. XLIIII.

Autre fabrique inuêtee à la mesme fin que la precedente, laquelle opere sans intermission, en tirant l'eau de tout puis facilement sans pompes, & ce par mouuement alterne du contrepois & de la balance.

DECLARAT. DE LA XLIIII. FIGVRE.

Le mouuement qui fait monter l'eau en ceste inuention est industrieux. car deux roues dentees à demi font faire plusieurs tours à vn pignon, dans lequel leurs dents entrent. Et la cause est pource que quand deux roues se meuuent, l'une va d'une sorte, & l'autre d'une autre. Partant si quelqu'un vouloit faire aller deux roues l'une comme l'autre, il ne faudroit pas qu'elles s'entremenassent, mais qu'un mesme pignon menast l'une & l'autre. Ce qu'il a falu entendre pour venir à la cognoissance de ce qui sera dict.

La gueule du puis enuiron le milieu de la page tendant au midi, a entour soy l'assemblage de quatre colonnes qui portent la couuerture, icelles colonnes estans iointes les vnes aux autres par des pieces de bois trauersieres, deux desquelles (à scauoir celle qui est vers orient, & celle qui est vers occident) seruent à porter trois arbres ou aisieux qui tournent sur leurs puiots dans icelles. D'iceux arbres celui du milieu a vn pignon à lanterne vers occident, loing de la
ligne

Des figures de ce Theatre.

ligne de septentrion 2.m.7.p. & d'occident 1.m.10.p. & un barrillet vers orient loing du pignon 6.p. Il-y en a d'avan-
tage un autre tout semblable à cestuy-ci, au fond du puis en la ligne de midi, loing de la ligne d'orient 1.m.6.p. &
alentour d'eux, est vne chaine infinie, où sont attachez plusieurs seaux qui pendēt librement: lesquels seaux montent
& aualent au prix que le mouuement se fait. Deca & dela l'aissieu susdict, il-y-a un autre aussieu: l'un (comme le
monstre sa figure) à cause des raisons de perspective, plus meridional, & l'autre plus septentrional. Au meridional
vers occident il-y-a vne roue, de la moitié de laquelle sortent des dents, lesquelles entrent dans le pignon de l'aissieu
du milieu: & vers l'autre bout deuers orient a vne roue demi dentee aussi. En l'autre aussieu y-a tout de mesme qu'en
cestuy-ci, la roue orientale, duquel est menee par la roue orientale de cestuy-ci, par le centre de laquelle passe l'arbre
qui la porte, afin de recenoir la balance qui est menee par un homme seul: de sorte que la mouuant de midi vers se-
ptentrion, l'autre roue fait que la roue de son arbre demi dentee face aller le pignon de l'arbre du milieu: & mouuant
de septentrion vers midi, elle fait tourner la roue demi dentee de son arbre, de laquelle les dents entrent au pignon de
l'aissieu du milieu. Parainsi l'une apres l'autre elles font entrer les dents des roues demi dentees au pignon, qui rece-
uant de l'une un demi tour, & puis de l'autre autant, fait un tour qu'elle multiplie autant de fois que la balance fait
de doubles demi tours. Au reste il-y-a de bon en ceste machine, que iamais les seaux ne retournent, mais sont tirez à
mont, où estans venus, faut qu'un homme verse, ou bien que celuy qui tourne, les aille verser.

PROPOSIT. XLV.

Nouveau genre de machine, par laquelle un homme peut descen-
dre plusieurs autres en toute assurance, & aussi remonter dans vne
miniere, tant profonde qu'elle soit: & par mesme moyen en tirer les
metaux ia fossroyez.

DECLARAT. DE LA XLV. FIGURE.

IL n'y-a nul qui ayant experimenté la force de la vis sans fin, doute que ceci ne se puisse faire, lors qu'il enten-
dra les parties & vsage de ceste inuention, qui consiste toute en ce qui est au haut de la figure vers septentrion: a scauoir
en vne tine quarree, qui a deux grosses pieces de bois d'un costé & d'autre, auxquelles est un tour, au bout duquel est
la vis sans fin, qui le meine loing de la ligne de septentrion 1.m.18.p. & d'orient 1.m.3.p. vne mesme chaine estant entor-
tillee autour le mesme tour, & d'un mesme costé. Ce qu'entendra facilement celuy qui regardera de pres la figure. La
mesme chaine vient se rendre aux poulies qui sont vers septentrion loing de la ligne septentrionale 1.m.6.p. & d'orient
1.m.15.p. & 1.m.8.p. Le reste est facile à comprendre par les delineaments de la figure.

PROPOSIT. XLVI.

Nouuel engin procedant de la balance, par lequel l'eau courante
soufleue elle mesme à certaine hauteur, principalement pour arrouser
en abondance les terres arides & prochaines. Cependant la roue, qui
fait tout, trempe dans, de peur qu'elle ne se corrompe par le hasle.

DECLARAT. DE LA XLVI. FIGURE.

LA force de l'eau & la facon de la roue qui conduit la balance sont la cause de la gentillesse de ceste inuen-
tion, de laquelle les parties sont telles.

L'assemblage qui soustient tout est en mode de treteau, ayant deux pieds de chaque costé, qui sont deux pieces de
bois pareilles, entre lesquelles demeure la balance, comme il est aisé de voir par la figure. La balance a son clou sur qui
elle tourne, loing de la ligne de midi 2.m.9.p. & d'occident 1.m.6.p. estant en ceste piece de bois fixe qui tient au haut
de l'assemblage loing de la ligne de septentrion 1.m.8.p. & d'occident 1.m.6.p. & est icelle piece fendue vers les pinots
de la balance, afin que la balance ait libre mouuement haut & bas. Au bout meridional de la mesme piece est un
trou où entre le pinot de l'arbre de la roue, l'autre estant en vne pierre en l'eau loing de la ligne de midi 16.p. & d'occi-
dent 1.m.5.p. En la balance loing de son milieu d'un costé 9.p. & de l'autre 10.p. un canon rond, qui tourne afin que
E. i.

Declaration

la roue puisse mieux faire hausser & baisser la dicte balance, qui a à l'un & à l'autre bout un seau, dont l'un puisse en orient, & l'autre en occident: & doivent estre versez par un homme lors qu'ils sont au haut. A l'arbre qui tourne sur ses pinots, come nous auons dict, il-y-a une roue ailée que l'eau fait mouuoir, qui est celle qui est en l'eau, & une autre demie qui a une partie plus haute que l'autre: de sorte qu'elle va tousiours en haussant. Ceste la est la cause de faire leuer & baisser les seaux. car quand le seau qui est bas sera plein, le court de la roue se viedra mettre dessous la balance, & la poussera en haut, tant qu'estât venue au haut bout, elle comence à laisser la partie qu'elle portoit pour prendre l'autre, come elle auoit faict la presente. Qui est toute la subtilité de ceste tresutile inuention, come l'experiece le monstrera.

PROPOSIT. XLVII.

Par ceste neufue & durable machine avec un tuyau & soupapes posees dans la teste de deux courts tuyaux, on tire l'eau bien facilement d'un puis profond, par le hausser & baisser de la balance avec la vis.

DECLARAT. DE LA XLVII. FIGURE.

CEUX qui ont esté sur mer, ou qui hantent les lieux où on se sert de pompes, & qui cognoissent assez quelle est leur propriété à faire monter l'eau terriblement haut, pourront aisement comprendre la force de ceste-ci, qui est aidée par autres parties, de sorte qu'elle donne quatre voire cinq fois autant d'eau qu'une commune. Ses parties sont telles dedans & dessus le puis où elle est constituée. Premièrement sur la gueule du puis est un assemblage de deux châtiens, sur lesquels tourne un arbre qui au milieu a une vis bipartie, c'est à dire ayant une distinction au milieu, & son areste allant d'un costé & d'autre, en laquelle il-y-a deux escroües qui en mesme temps & par mesme mouvement s'approchent du milieu, & l'une de l'autre, & puis de mesme s'en reculent. Aux bouts de la vis il-y-a deux bras qui ont à leurs bouts des chaines: puis au bout occidental de l'aïsieu ou arbre ia dict est une balance. Aux deux escroües qui sont entour la vis est attaché un sautereau un pied en l'une, & l'autre en l'autre, ainsi qu'auons dict en la 14 figure, ayant aussi mesme ou semblable usage. Au bout du dict sautereau vers septentrion est la perche qui fait moter l'eau des soupapes que i'appelle bourses ou vaisseaux du bas, pour le donner à entendre à ceux qui ne scauent que c'est que soupape. lesquelles bourses sont vers midi, la pompe commençant au dessous du sautereau, & venant finir loing de midi 1. m. 4. p. où elle est croisée d'un tuyau aussi gros qu'elle, qui est appuyé sur deux autres tuyaux, & une piece quarree, un desdicts tuyaux estât loing d'orient 1. m. 6. p. & l'autre d'occident 1. m. 7. p. la piece quarree est au milieu entre les deux en laquelle est un clou ou petit aïsieu qui porte deux balances, dont l'une se void qui est longue de 22. p. à laquelle l'autre est pareille, le clou estât loing de la ligne de midi 15. p. & d'orient 1. m. 13. p. Loing duquel d'un costé & d'autre 3. p. sont fendues les balāces, la fente ayant environ 5. p. estant de telle largeur qu'elle recoit les pinots des vaisseaux qui sont peints à la marge, lesquels se mettent dans les tuyaux qui sont sous la pompe, qui sont fendus pour la mesme raison que les balances, lesquelles ont attachees à leurs bouts les chaines qui viennent des bras d'en haut. Tout cela est cause du mouvement & de ce que l'eau est tirée à mont. car quand l'ouurier donne branle à la grande balance, elle fait que les petites balances d'embas par le moyen des chaines font leur deuoir, & que le sautereau tire la perche, où tient une bourse, afin que par ce moyen l'eau monte en abondance. Ce qui appert.

PROPOSIT. XLVIII.

Ceste nouvelle machine enseigne par quel moyen l'eau courante, d'un lieu bas se peut monter elle mesme par un tuyau iusques au haut d'une tour, & ce par le moyen d'une signole qui fait hausser & baisser.

DECLARAT. DE LA XLVIII. FIGURE.

CE qui se fait en la precedente par la force d'un homme, est faict par ceste par l'eau mesme: ce qui se cognoistra par ce qui s'ensuit.

Vers orient est une roue comme celle d'un moulin à eau, laquelle a à son aïsieu ou arbre une roue dentee, qui meine un pignon à lanterne, qui à son arbre a une signole, de laquelle l'autre partie ne vient pas de mesme train que celle qui

Des figures de ce Theatre.

celle qui est en l'arbre du pignon, mais demeure plus haut, en esgard à l'aïsieu qui passe par le centre du cercle imaginaire qui se fait par la revolution de ladicte signole. Ce bout la, ou partie, entre en un canon qui est loing de la ligne de midi 1.m.14.p. & a ce canon mouuement haut & bas. car quand la signole meut, elle le contraint d'aller tantost haut, tantost bas. Et parainssi est la cause du mouuement de la perche, de laquelle le bout est vers septentrion loing de la ligne septentrionale environ 1.m. & de l'occidentale 17.p. y ayant un anneau qui est pris d'un autre qui a deux pieces de bois en facon de fleau, qui font ressort: de sorte qu'elles sont tousiours eslargies, sinon quand le mouuement les contraint de se presser, & lors elles font que la perche tire l'eau à mont. Ces deux pieces la seront appelees bras, qui à leurs bouts tiennent deux autres grands bras qui se ioignent comme des tenailles, au point loing de la ligne de midi 23.p. & d'occident 17.p. Ces bras ci sont ainsi recourbez, comme ils se voyent en la figure, afin que ceste piece qui a son milieu loing de la ligne de midi 2.m.16.p. & d'occident 18.p. aux bouts de laquelle ils entrent, les face serrer, étant ladicte piece tirée ou poussée par le moyen du mouuement du canon susdict, qui tient au bout d'une piece tenant à ceste-ci. Ce qui est evident, ne restant seulement qu'à bien considerer la figure qui est assez claire.

PROPOSIT. XLIX.

Par ceste forme de pompe avec la raison de la perche & du contrepoix en tirant & poussant, on peut faire monter l'eau tant que la force de l'homme peut faire.

DECLARAT. DE LA XLIX. FIGVRE.

EN ceste pompe qui est dans un puis, comme la 47. il y a une partie de ce qui a esté dict en icelle, & en une de celles de devant, tellement qu'elle est tirée de l'une & de l'autre. Or ses parties sont telles.

Dessus le puis il y a une piece qui soustient une balance, de laquelle les pivoets sont loing de la ligne de septentrion 22.p. & d'occident 1.m.1.p. Au bout occidental d'icelle pend une chaîne qui vient au fond du puis iusques à un anneau qui est loing de la ligne de midi 1.m. & d'occident 20.p. où tient un poix qui entre dans ce canon porté sur deux pivoets, afin qu'il meue librement, & que le poix ne branle deca ny dela dans le puis, mais demeure dans son canon où il a libre mouuement haut & bas. A l'autre bout qui est vers orient est une autre balance, à laquelle tient un anneau, d'où pendent trois bastons: dont celui du milieu est la perche qui fait monter l'eau, les deux autres tiennent à deux bras qui finissent au point loing de la ligne de midi 20.p. & d'orient 1.m.18.p. où il y a une espee de sautereau qui est attaché au gros tuyau d'embas aux points loing desdictes lignes 15.p. & 1.m.20.p. l'un: 14.p. & 1.m.17.p. l'autre. iceux estans tousiours fixes, mais les deux autres où se forme le sautereau s'approchent ou reculent l'un de l'autre. Celui d'embas ayant dans soy le bout d'un bois qui porte un tel vaisseau dans le gros canal que ceux de la 47. ledict baston tenant & mouuant sur une cheuille loing de la ligne de midi 15.p. & d'orient 1.m.3.p. & demie. Maintenant quand l'homme tire la balance, le poix luy resiste, qui la tire apres luy: de sorte qu'il n'a peine que de tirer. Ce que faisant, le sautereau fournit d'eau, puis quand il leue, la perche la tire du tout. Ce qui est proposé.

PROPOSIT. L.

Nouvelle composition de machine, à laquelle il y a une roue garnie de toiles, qui est poussée par le vent si fort au dessus le dome d'une tour, qu'elle peut amener en ayant l'eau d'une profondeur infinie.

DECLARAT. DE LA L. FIGVRE.

CE qui a esté fait par les pompes cideffus par le moyen d'hommes ou d'eau, est ici fait par le vent. Ce qui s'entendra par ce qui s'ensuit.

Au haut vers septentrion est une roue, où il y a des toiles tendues afin qu'à tous vêts elle puisse tourner, en l'arbre de laquelle est une autre roue détece qui meine un pignon à l'atérne, en l'arbre duquel est un barrillet qui a des arestes en facon de sie, auquel un tout semblable est au fond du puis vers midi. Entour ces deux barrillets est une chaîne infinie où sont plusieurs coquilles fond cōtre fond, afin qu'en quelque maniere que ce soit il y en ait tousiours de pleines. car elles montent ou descendent au prix que le vent fait tourner la roue. Au reste ces deux canaux dans lesquels elles

E. y.

Declaration

entrent, faits en forme de pompes, doynent estre haussez, afin que les goutieres estans pres du barrillet, l'eau se verse dedans elles. Le tout est aisé par l'aspect de la figure qui est assez claire: un homme pouunat servir au lieu de vent à la neceßité.

PROPOSIT. LI.

Fontaine à vent perpetuelle à laquelle est mis tel son & accord musical, & aussi tel mouvement cœleste (tous deux pareillement perpetuels) qu'on y voudra dextrement appliquer.

DECLARAT. DE LA LI. FIGVRE.

IL faut entendre que l'eau ne peut monter d'elle mesme plus haut que le lieu d'où elle vient: qui est la cause pour laquelle il faut en ceste fontaine la faire venir d'assez haut, afin qu'estant une fois entree, elle se puisse pousser: & faut aussi qu'il-y-ait assez d'eau, afin que le canal du mouvement soit toujours rempli. Quant à cela qui est vers midi, il est commun, & n'y a de singulier que les mouvemens & la continuation de l'eau par le canal. ce que pour n'auoir bien encor experimenté d'une facon gentille que ie scay, ie ne diray point d'auantage, veu mesmes qu'il y en a de plusieurs sortes que beaucoup scauent, auxquelles ils pourront adiouster le surplus de cest edifice, où on void vers midi des testes de vent qui soufflent l'eau, & au dessus vn mouvement cœleste, qui doit estre fait de roues comme es horologes, estant toutesfois poussé par le mouvement de l'eau. Le reste ie le reserve à une autre fois.

PROPOSIT. LII.

Especie d'artifice nouveau, propre à ietter l'eau contre le feu, mesmement lors que la flamme empesche que nul ne peut approcher de l'edifice qui ard.

DECLARAT. DE LA LII. FIGVRE.

ON ne scauroit penser cōbien de fois est requise ceste inuention pour esteindre les grands feux desquels on ne peut approcher. car par icelle de loing on y peut ietter l'eau sans grāde difficulté, cōme on pourra entendre par ce qui suivra. Toute la machine est menee sur deux roues, dont le moyen de celle qui se void est loing de la ligne de midi 2.m.12.p. & d'orient 22.p. & est soutenue sur quatre pieds, dont deux se voyent loing des lignes susdictes: a scauoir 2.m.2.p. & 4.p. l'un, & 18.p. & 18.p. l'autre, estans tous deux tenus en raison par deux crochets, qui viennent de la base, en laquelle au bout septentrional est vne grille pour arrester la machine. Les deux autres pieds viennent des deux pieces qui soustiennent le vase dans lequel est l'eau, desquels celui qui apparoit plus est attaché avec vne cheuille loing de la ligne de midi 2.m.8.p. & d'orient 1.m.16.p. & finit à 3.m. loing de la ligne de midi, & 20.p. d'orient. Or le vaisseau est fait en maniere de cone, afin que l'eau aille plus impetueusement. car quand les vases sont en colonnes, l'eau va plus doucement. Ledit vase tourne sur deux pinots qui entrent es pieces qui le soustiennent: dont l'un se void loing de la ligne de midi 2.m.9.p. & d'orient 1.m.7.p. & est le vaisseau tenu en raison par la cheuille qui entre dans les demi cercles qui sont au derriere qui est vers midi, lesdicts cercles seruant à hausser ou baisser la bouche de la machine, selon la hauteur du feu. Vers la bouche il-y-a vn entonnoir pour emplir le vaisseau, duquel l'eau est ietee par le moyen de la vis que fait aller par demi tours l'homme qui tient derriere la signole qui y est iointe. Au bout de la vis est vn baston qui pousse vne piece de bois fendue en quatre, laquelle se met dedans le vaisseau. & ladicte piece a des ressorts, par le moyen desquels ses parties sont reiettees pour remplir le vaisseau lors qu'elle est tiree vers la base: ayant vne piece de cuir au bout qui va deuant, afin qu'en se pressant ou eslargissant, à cause de la largeur ou estroissement du vase, l'eau n'entre dedans elle, & aussi afin qu'elle la chasse dehors, comme il est requis. Ce qui est aisé à experimenter, la raison estant certaine & euidente.

PROPOSIT. LIII.

Artifice non à mespriser, pour sauuer non seulement la marchandise

Des figures de ce Theatre.

dise d'un bateau submergé au port, mais aussi le vaisseau mesme ou entier, ou en pieces, pour en vuider le port.

DECLARAT. DE LA LIII. FIGURE.

IL n'y a pas grande nouveauté en ceste machine, sinon en la maniere de faire tourner la vis. Quant à l'assemblage, la figure le monstre assez, reste de scauoir comment la vis est gouvernee. Au haut de l'assemblage vers septentrion, il-y-a deux pieces de bois paralleles, entre lesquelles est vn moyen duquel viennent plusieurs rayons. Ce moyen la tourne entre les pieces qui sont faictes en escroüe par où passe la vis, le moyen l'estant aussi. Ainsi il aduient que la force de soutenir est grande, le faix estant tiré par le moyen des deux hommes qui poussent les rayons, le fardeau estant au bout de la vis vers midi, pris par ces crochets qui y sont, lesquels ont la facon de ceux dont on vse en plusieurs ports & es haies bes bonnes villes.

PROPOSIT. LIIII.

Machine tirant à celle qu'inuenta Archimedes à Syracuse, quād par le moyē de la vis sans fin, il tira avec vne main, de terre ferme en haute mer vn vaisseau de merueilleuse grādeur en la presence du Roy Hieron, & d'une multitude infinie qui n'en put autāt faire de toutes ses forces coniointes.

DECLARAT. DE LA LIIII. FIGURE.

NOUS auons veu cideuant quelle force a la vis sans fin, & combien elle se multiplie estant doublee, maintenant ici il monstre combien elle a de force estant triplee. Parquoy afin de le bien entendre, venons à sa disposition en ceste inuention.

Premierement il faut remarquer que le vaisseau qui doit estre tiré est cestuy la qui est sur des rouleaux vers septentrion, lequel est lié d'une corde qui est tiree par l'arbre du cētre d'une des roues autour duquel elle se deuide: les vis sans fin estans en ce vaisseau qui est ancré vers midi, sur lequel y-a vn assemblage de pieces de bois opposees l'une à l'autre, afin que sur icelles les aisieux des poulies puissent tourner, lesquelles s'ot ainsi disposees. Loing de la ligne de midi (que nous garderons sans la redire) 18. p. & loing de la ligne d'occident (que nous garderons aussi) 1. m. 17. p. est vn homme qui donne le mouuement à la vis sans fin, & fait tourner l'arbre, duquel le pignon est à 1. m. 3. p. & 1. m. 15. p. lequel meine la seconde roue qui a son centre à 1. m. 3. p. & 1. m. 16. p. & demie, de laquelle l'arbre fait mouuoir la premiere roue qui a son centre à 1. m. & 1. m. 19. p. de laquelle finalement l'arbre fait tourner la troisieme, qui a son centre à 1. m. 11. p. & 1. m. 16. p. & demie alentour de l'arbre, de laquelle s'entortille la corde qui tire le fardeau. Le reste gist en experience.

PROPOSIT. LV.

Artifice où est la vis sans fin, lequel sert à leuer avec peu d'ouuriers les nauires hors du port, ou les tenir suspendues pour les racoustrer.

DECLARAT. DE LA LV. FIGURE.

EN la machine de deuant nous auons veu la force de la vis sans fin triplee, & ici est monstre la force de la simple, de laquelle depend toute la subtilité de ceste inuention.

La machine est telle que son corps, qu'on peut remarquer par la figure, est sus vn pinot, autour lequel il bouge, comme plusieurs cydeuant, estant ainsi formé pour la force de la machine qui a le haut comme vne grue commune, ceste piece de bois qui tend en midi, où sont deux hommes, seruant à la tourner. Au reste la vis sans fin est loing de la ligne de midi 1. m. 18. p. & d'occident 1. m. 20. p. estant menee par cestuy-la qui est tout debout aupres la corde qui s'entortille autour son arbre, se venant rendre au bout du bec de la machine qui est vers septentrion: duquel pend vne moufle à six poulies, de laquelle la force est connue par le frequent usage. Alentour des poulies de ceste

Declaration

moufle passe la corde qui vient de la vis sans fin, de laquelle l'autre bout est avec celle qui tient la moufle pendue. Quant à ceste corde qui est outre celle que nous auons dict vers midi, elle ne sert de rien. L'experience monstrera la verité de l'inuention.

PROPOSIT. LV I.

Machine par laquelle avec la raison de la balâce vn nauire tout chargé & équipé entierement de tous ses harnois, peut estre tiré hors, & puis transporté hors, & remis dans le port où il sera paruenü.

DECLARAT. DE LA LVI. FIGVRE.

C'EST vne chose assez commune que la balance, & de laquelle mesme les plus simples ouuriers vsent: mesme-ment quand ils veulent leuer quelque pierre, ils prennent vne longue piece de bois, de laquelle ils mettent vn bout sous le fardeau, puis sous la piece mettent vne piece fort pres du fardeau, afin que puis apres estans au long bout ils leuent le fardeau. J'ay declaré cideuant la raison de ceci, parlant des roues. Ce qu'estant cognu, on pourra estimer quelle force luy sera adioustee estât multipliee, c'est à dire, estât tiree par vne, puis par vne autre, cōme il appert par ce qui s'ensuit.

En ceste figure la piece qui est parallele à la ligne de septentrion, & loing d'icelle 1.m.13.p. est le soustènement de la machine, de laquelle le dessous tourne sur vn pinot, cōme le pourra voir le diligent lecteur. En ceste piece il-y-a ce qui s'ensuit. Loing de la ligne d'occident 13.p. & demie, & de midi 1.m.14.p. est le pinot de la balâce, de laquelle le bout est loing de septentrion 5.p. y ayant les chaines qui portent les crocs qui happent les cordes du nauire. Outreplus loing des mesmes lignes 1.m.4.p. & 1.m.18.p. est le pinot de la seconde balâce, de laquelle l'autre bout est loing de la ligne de midi 1.m. & d'occident 1.m.8.p. au milieu de laquelle est vne piece de bois qui tire la premiere balance: autant en vient de la troisieme qui tire ceste seconde, ce triangle qui apparoit ne seruant qu'à tenir en raison les balāces, afin qu'elles ne varient ca ne la. Or la troisieme balance n'a pas son pinot au corps de la machine, comme les autres, mais loing de la ligne de midi 2.m.11.p. Et ceci est afin que si l'homme avec ses cōtrepoix n'est assez fort, on mette des poix à l'autre bout qui est septentrional. Le tout ainsi entendu, l'experience monstrera l'vtilité & gentillesse de la machine.

PROPOSIT. LV II.

Artifice lequel posé en la quille d'vn nauire qui par vn canal recoit l'eau de part en part, montre par le mouuement de ses roues le chemin qu'on aura fait en nauigeant.

DECLARAT. DE LA LVII. FIGVRE.

TOUTE la subtilité de ceste inuention est aux roues qu'il faut faire comme es horologes ou rotissoirs qui se font en Allemagne, l'vne des roues (qui est la premiere) estât à ailes, afin que l'eau qui passe par le canal qui est fait expres au nauire, elle tourne & face tourner les autres, qui doyuent estre disposees selon leur ordre: par le moyen dequoy elles rendront deuoir, pourueu qu'on ait fait experience de la quantité de dents qu'il faudra à celle qui menera l'esguille qui monstrera les milliaires. Ce que ie laisse pour ceste heure à experimenter à ceux qui vont sur mer, & qui la hantent.

PROPOSIT. LV III.

Artifice par le moyen duquel on peut tirer du fond de la mer vn nauire submergé, avec toute sa charge, pourueu que la hauteur de l'eau n'outrepasse point trēte toises, ou que le nauire ne soit dutout enseueli de limon, ou dutout rompu & froissé.

DECLARAT. DE LA LVIII. FIGVRE.

TOUTE la force de ceste machine est en la duplication de la vis sans fin. Parquoy pour venir à ce qui est proposé, le nauire submergé est vers la ligne orientale, à laquelle plusieurs cordes sont attachees, lesquelles viennent respondre
aux vis

Des figures de ce Theatre.

aux vis sans fin qui sont es deux bateaux ioints ensemble par des pieces de bois vers occident, lesquels portent chacun deux vis sans fin doublees, lesquelles sont ainsi aux quatre assemblages qui sont sur les bouts des bateaux: a sçavoir en celui qui est plus meridional & oriental. A 19.p. de la ligne de midi, & de celle d'occident 1.m.4.p. est le bout d'une signole qu'un homme fait tourner, & la dicte signole tient au pignon de la vis sans fin, de laquelle la poulie a son centre loing de la ligne de midi 12.p. & d'occident 1.m.6.p. auquel est un arbre qui a un pignon qui meine une autre poulie, & est le dict pignon loing des lignes susdictes (lesquelles nous garderons pour le reste, afin d'eiter redictes) 13.p. & 1.m.3.p. & demie, le centre de la poulie estant à 12.p. & 1.m.1.p. & demie, ayant un arbre, autour duquel la corde qui est nouee à 1.m. & 2.m.9.p. est deuidee: & ceci soit pour une. L'autre qui est sur mesme bateau en l'assemblage plus septentrional & oriental a sa signole qui est au bout de l'arbre de son premier pignon à 2.m.1.p. & 1.m.4.p. & est semblable à la premiere, ayant le centre de sa roue ou poulie à 2.m.8.p. & 1.m.5.p. son arbre menant de mesme qu'en celle de deuant la roue de l'autre, de laquelle le centre est à 2.m.7.p. & 1.m.1.p. & entour son arbre se deuide la corde qui est nouee à 1.m.18.p. & 2.m.6.p. Ces autres sont differentes un peu, car celle qui est vers midi a son pignon à 18.p. & 15.p. & le centre de sa poulie à 18.p. & 16. De laquelle l'arbre meine la roue qui a son centre à 20.p. & demie, & 18.p. en l'arbre de laquelle est la corde qui est nouee à 1.m.1.p. & demie, & 2.m.6.p. L'autre est toute semblable, sinon qu'elle est tournee autrement, & tire la corde nouee à 1.m.16.p. & 2.m.6.p. Cela ainsi entendu, lors que les ouuriers tournent, les vis sont si fortes que ou les cordes rompront, ou le fardeau viendra à mont. Quant au nauire qui est en septentrion, il sert pour tirer celui qui leue le fardeau.

PROPOSIT. LIX.

Gentille espee de pressoir tenant peu de place, lequel pressoir est composé de trois vis sans fin, & peut seruir à presser draps & la vendange: imprimer chartes geographiques & tapisseries sur toile ou cuir.

DECLARAT. DE LA LIX. FIGURE.

CEUX qui tous les iours se seruent des vis, & ceux la aussi qui quelques fois en voyent l'experience tant aux presses communes & pressoirs qu'es machines dont vsent souuent les charpentiers & sieurs vulgaires de bois, peuvent assez entendre quelle force & propriété est cachee en icelles, veu que deux hommes par leur moyen leueront & presseront ce que dix à grand peine remueront seulement. Et ie di ceci afin que l'excellence & propriété de ceste presse soit mieux entendue, mesme la vis estant triplee, & l'escroüe de chacune avec l'aisieu qui meine la signole qui est du costé d'occident estans trois vis sans fin, de laquelle la force est admirable. Mais afin de venir à la matiere, ceste presse est telle que son assemblage est soustenu à terre, afin que son poix soit mieux supporté: ou bien sur quelque bon plancher, ayant deux bonnes gemelles, ayant chacune une renure où puisse aller la planche qui presse. Entre le haut & le bas de l'assemblage au milieu est une soline trauersiere fixe, parallele à la ligne de midi, loing d'icelle de 2.m.7.p. A laquelle est une autre semblable loing de 5.p. d'icelle. Ces deux pieces sont percees en rond, & l'une dessus l'autre, afin que les vis y puissent entrer librement. Entre ces deux solines sont les trois escroües des vis qui sont menees par l'aisieu qui tourne dans les trous de ces deux pieces quarrees qui sortent en dehors vis à vis du milieu desdictes solines. Au bout de l'aisieu vers occident est une signole que meine un homme, & au bout d'orient sont huit rayons (encor qu'on y en puisse mettre tant qu'on veut) qu'un homme tire avec un crochet estant loing d'icelles ou au dessus, car ainsi il aide fort tant par sa force & par son poix, que par la distance, laquelle aide beaucoup en telles choses. ce que monstre l'experience. Et mesme ayez une corde en la main qui soit courte, & l'attachez à quelque fardeau: aussi ayez en une longue, vous ferez plus avec la longue qu'avec la courte, d'autant qu'à la dicte corde vous communique comme une partie de sa force, vous en baillant plus que la courte à cause de sa longueur. Ainsi ce crochet a grande force pour mener les vis qui en ont une qui est incroyable. Parquoy toutes ces forces communiquees l'une à l'autre, & finalement aux vis interieures, font qu'elles poussent terriblement.

De ceste sorte sans estre contrainct au nombre des vis, on en peut mettre ou une seulement, ou deux, ou trois (comme ici) ou quatre, ou plusieurs, selon qu'on en a affaire. Quant à ce qu'elle peut seruir à imprimer les chartes, c'est pour ce que lon presse tant qu'on veut ceste presse, differant des ordinaires des imprimeurs en ce que la laissant, elle presse toujours sans qu'il faille y tenir la main. Ce qui est ce que promet la proposition. le diligent recercheur y pourra adiouster selon ses commoditez.

Declaration

P R O P O S I T. LX.

Inuention à peine croyable, laquelle avec la raison de la balance & de celuy qui est contre la nature des choses legeres, peut en temps calme faire acheminer vn nauire à cela composé, & à peu de vent le faire haster, & en temps impetueux moderer sa course sur la mer. Cho se notamment digne d'estre entendue d'un roy.

DECLARAT. DE LA LX. FIGURE.


I E ne pense point qu'on puisse exprimer par paroles l'excellence de ceste machine, veu que par le mouuement qui est cause par la force de deux hommes, & d'une balance, le nauire peut estre poussé autant comme par vn moyen vent. Ce qui se pourra cognoistre par ce qui s'ensuit de la declaration des parties avec leurs proprieté & usages.

Premierement il faut que la nef ait deux proues, afin qu'en l'espace cōtenu entre icelles, puisse aisement mouuoir la balance qui ioue sur deux pinots: desquels l'un est en vne proue, & l'autre en l'autre. Et ceste balance ainsi iointe au nauire se void en celuy qui est peint au milieu de la page: mais la balance l'est plus particulièrement au port appuyee contre le pharon qui est vers midi, ayant de long en tout 2.m.4.p. depuis le bout qui touche quasi la ligne de midi iusques au diametre du vaisseau fait en forme de rhombe spherique, duquel le mouuement est libre sur ses deux pinots, qui sont dans les deux branches du bas de la balance, qui sont fendues iusques au milieu, afin que le rhombe puisse estre haussé & baissé. Au reste les deux pinots de la balance sur lesquels elle meut, sont loing en ceste figure de ceux du rhombe de 15.p. d'un costé, & 12. de l'autre: combien qu'ils en doyent estre également distans. Mais ici la raison de perspective gardée en la peinture monstre autrement: ce que ie di pour ceux qui n'ont pas encores ouy parler ni frequente les peintres. Quant au rhombe, il tourne sur l'eau au prix que la balance remue, & estant grand, fait par son cours cōtraire que la nef est poussée. Or estant la balance assemblee au nauire, elle est tirée par ces cordes qui se voyent à son bout, lesquelles respondēt à vn tour loing de la ligne de septentrion 1.m.14.p. & de celle d'orient 1.m.10.p. qui est mené par deux homes, lesquels laissent aller la corde lors qu'elle est toute deuïdée. Ainsi la balāce eschappant fait que le rhombe tourne au contraire, & qu'il pousse la nef. La cause de ce poussement est en ce que le poix de la balance contraint le rhombe à s'approcher du bas du nauire: lequel d'autant qu'il a libre mouuement, tourne, & par ainsi s'ac complit la proportion: qui est ce qui y doit estre consideré. Quant au reste, ceste nef qui est vers septentrion, monstre la disposition de la balāce & du rhombe. Voila ce que pour maintenāt Dieu ma donné pour vous cōmuniquer sur ces machines, ce que i'espere deduire particulièrement par raisons demonstratiues en vn autre liure que Dieu aidant ie mettray en lumiere, si vostre bon œil & la faueur de ceux qui ont la puissance & le vouloir de ce faire m'y incitent & aident. vous priant cependant de receuoir le tout en bonne part.


Fin de la declaration des figures
de ce Theatre.





INSTRUMENTA ALIQVOT, GEOMETRICA, AC MECHANICA RATIONE INVENTA, PRO DIMENSIONIBVS ET FVNDAMENTIS, QVIBVS MAIORI EX PARTE IN-
NITVNTVR SEQVENTES IN HOC LIBRO INVENTIONES-




INSTRUMENTVM NOVVM ET SINGVLARE, METIENDIS
 OMNIBVS PARTIBVS CVIVSVIS CORPORIS
 PROPOSITI, AD PERCIPIENDAM EARVM SYMMETRIAM,
 IN ILLIVS CORPORIS STRUCTVRA-




THE UNIVERSITY OF CHICAGO
LIBRARY
540 EAST 57TH STREET
CHICAGO, ILL. 60637




3 CIRCINVS NOVVS ET VNIVERSALIS, DESCRIBENDIS
EX ORDINE PIRAMIDVM ET FIGVRARVM
RECTILINEARVM, QVIBVSVIS FIGVRIS
PLANIS CVRVILINEIS, QVÆ RESPONDEANT
ORDINI IPSARVM FIGVRARVM RECTILINEARVM-



CIRCINVS NOVVS SUPERIORI CONTRARIVS,
 VTPOTE DESCRIBENDIS FIGVRIS RECTILINEIS, APTVS,
 EX ORDINE CERTARVM PYRAMIDVM CONVEXARVM,
 QVÆ PRO BASI HABEANT PRECEDENTES
 FIGVRAS PLANAS ET CVRVILINEAS.







CIRCINVS NOVVS ET VNIVERSALIS, DELINEANDA
VNO DVCTV FIGVRÆ OVALIS, DIAMETRO VEL
LONGIORE VEL BREVIORE, QVANTVMLIBET
PRODVCTÆ AVT CONTRACTÆ-




Orient

Midi


CIRCINVS NOSTRÆ, VT RELIQVI QVOQVE, INVENTIONIS,
 À NOBIS IAM OLIM COMMVNICATVS MVLTIS, AD
 DESCRIBENDAM QVAMLIBET LINEAM SPIRALEM
 IN PLANO, CITRA FVNICVLI CIRCVMPPLICATIONEM,
 AVT ALIAM FALLACEM RATIONEM-




7 TORNVS NOVVS ET GEOMETRICVS, AD REDVCENDVM
IN FORMAM OVALEM Q.VEMLIBET CYLINDRVM, ET
CONVM, CVM SVIS ORNAMENTIS, EX OMNI MATERIA
TORNATILI-




ALTERVM TORNIGENVVS, EX PROXIMO ORTVM, AD
 TORNANDVM, EXCAVANDVM, ET ORNANDVM
 IN FORMAM OVI PATERAS, ET VRCEOLOS, EX
 MATERIA QVALIBET FERRI PATIENTE-




TERTIVM TORNI GENVS, SVBTILITATE NON CARENS, AD
 IN SCVLPENDAM PEDETENTIM COCHLEAM CVIVSVIS
 FORMÆ, IN AMBITVM CVIVSCVNQVÆ FIGVRÆ ROTVNDÆ
 ET SOLIDÆ, VEL ETIAM OVALIS-




10 ALIUD DENIQUE TORNI GENVS NONDVM VISVM, PER POLIENDO
ET SECANDO MARMORI, AVT LAPIDI CVIVSVIS SPECIEI
ETIAM DVRIORIS, IN FRVSTA, AD ORNAMENTA
SVMP TVO SCAM AEDIFICIORVM-




SPECIES ÆQUIPONDII NOVI, QVOD AGITATVM MANV
 VNIVS, ET ALTERIVS, INSTAR CAMPANÆ PVLSATÆ,
 TANTVM VIRIVM HABET AD AGENDVM BINOS, EOSQVE
 IMMANES FOLIES IN FODINIS, VT ÆQVARE POSSINT
 EOS, QVI VEL VI AQVARVM, VEL EQVORVM IN
 QIRVM ACTORVM, PROMOVENTVR




MACHINA QVÆ PRÆCEDENTEM SVBSEQVI DEBET, TVM
 NOVITATE TVM PRÆSTANTIA, AD DIMOVENDVM SVPER
 INCVDE TÂM INGENTEM TVDITEM DVORVM HOMINVM
 LABORE, VT NIHIL PLVS EFFICIAS AVT EQVIS, AVT AQVIS-




NOVA. SECANDI ARBORES MACHINA, PER QVAM TANTVM
 OPERIS EXIBETVR AGITATIONE DVORVM OPERARIORVM,
 QVANTVM OCTO POSSINT VVLGARI RATIONE, VBI AQVÆ
 LAPSVS DEFICIT, DVMMODO EA STATVATVR IN LOCO
 DEPRESSO, ET IN QVEM PLANO PEDE TRAHI QVEANT ARBORES-




ALIA MACHINA NOVA, QVÆ EODEM LOCO QVO PRECEDENS
POSITA, IDEM PRESTAT NECESSITATE VRGENTE, VNO
OPERARIO, QVOD SUPERIOR DVOBVS, VT EIVS
DELINEATIO RATIOQVE MATHEMATICA, OSTENDIT-



15
PLOSTELLI GENVS NOVVM, QVO VNIUS HOMINIS
OPERA, LOCO AQUATO, VEL ACCLIVI, TANTVM POTEST
FERENDO ONERI, QVANTVM DVO VEL TRES
QVOCVNQVE ALIO MACHINAMENTO-




NOVA VEHICVLI RATIO, EX PRÆCEDENTI PLOSTELLO DEDVCTA, QVA
VNIVS EQVI QPERA, TANTVMDEM FERÈ ONERIS TRADV CITVR,
QVANTVM BIGIS VÛLGARIBVS SOLET.




NOVVM VEHICVLI REGALIS GENVS, QVOD QVIDEM VVLGATIS PAVLÓ VASTIVS EST, SED MVLTÓ
 COMMODIVS, VT QVOD VEL LOCO INÆQUALI PONDERE SVO LIBRATVM, TAM LEVITER FERATVR,
 QVAM CYMBA AQVA TRANQVILLA: NEC EIVS LECTICA SVBVERTI VILLO MODO, VEL CVIQVAM,


QVI VEHATVR, INCOMODARE POSSIT.




RECENS VASIS FORMA QVA ITA EXPORTARI QVEANT,
LIQVORES, VT VEL IN SVMMO AESTV, PERINDE
CALORE AFFICI NEQVEANT, AC IN VASIS
VVLGARIBVS-




ALIUD VASIS GENVS, EIVSDEM FERE VSVS CVM PROXIMO,
 SED PRÆTEREA HOC SINGVLARE HABENS, QVOD EODEM
 SILVBET FORAMINE IMPLETVR DIVERSIS LIQVORIBVS,
 QVO EXHAVRITVR, IDQVE CITRA VLLAM IPSORVM
 LIQVORVM MIXTIONEM-




NOVVM MACHINAMENTI GENVS PROVOLVENDIS, ET DIMOVENDIS LAPIDIBVS
 GRANDIVSCVLIS IN AQVAM DEMERSIS, VT DEINDE EVM IN LOCVM
 ADIGI QVEANT PALI, AD REFIGIENDVM VETEREM, VEL CONFICIENDVM
 NOVVM AGGEREM, SEV PORTVM, SEV PONTEM-




NOVVM ARTIFICIVM AD EXPVRGANDAM OMNEM COLLVVIEM, ET FARRAGINEM
HERBARVM, ET LAPIDVM, ET ALIARVM EIVS MODI SORDIVM, È PORTV PRIDEM
DESERTO, AVT STAGNO-




NOVA RATIO PALORVM CVIVSCVMQVE SINT
MAGNITVDINIS, AD PERPENDICVLVM DEFIGEN-
DORVM IN AQVA, AD QVASVIS MOLES FIRMITER
SVSTINENDAS SIVE QVIS PONTEM, AVT ARCEM
VELIT CONSTRVERE, AVT MARE INDE AVERTE-
RE, VBI COMMODE PORTVS EXTRVATVR-




NOVÆ MACHINÆ STRUCTVRA NON VVLGARIS,
AD PALOS OBLIQVÈ DEFIGENDOS IN AQVAM,
VT RECTÀ DEFIXI PRIORES PALI, PLVS VIRIVM
OBTINEANT, ADEA QVÆ SUPERSTRVENDA
VENIENT.




NOVA FORMA, QVA, PROXIMIS DVABVS MACHINIS,
DEVINCIUNTVR INTER SE QVALIBET PARTE
IPSI PALI, AD ÆDIFICIORVM SUPERSTRVEN-
DORVM PERPETVAM FIRMITATEM.




NOVA MOLETRINÆ TRVSATIENSIS STRVCTVRA, AD PREMENDOS, ET PARANDOS
 PANNOS, ET CHARTAM, ET TERENDAM AROMATATA, ET COMMINVENDAM SAXA
 METALLIS GRAVIDA, VT FVSIONI PARENTVR: NEC NON AD PERPOLIENDAM
 ET ACVENDAM FERRI QVÆVIS STRVMENTA, SOLVTIS TOLLENONIBVS È PISTILLIS-




NOVA FORMA MOLETRINARVM, QVIBVS PARVA
 HOMINVM MANV, TANTVMDDEM FARINÆ PENE
 REDDETVR, QVANTVM DVABVS ALIIS MOLETRINIS
 VEL VENTO, VEL AQVA CIRCVM ACTIS, SVPPEDITA-
 RI SOLET.




NOVA MOLENDI RATIO, QVA DVORVM HOMINVM OPERA,
CITRA AQVARVM AVT VENTORVM VIM, TANTVM FARINÆ
TRITICI DEPROMITVR, QVANTVM APTO LOCO AQVIS
AVT VENTIS ABVNDÈ SVPPETENTIBVS, SOLET



MOLETRINÆ AQUATILIS CONFICIENDÆ NOVA RATIO,
 QUÆ VSIBVS MVLTORVM SATIS SIT FVTVRA, ET SI
 MINVS AQVÆ SVPPETAT, QVAM QVOTIDIANIS MOLE-
 TRINIS SIT OPVS, MODO LABATVR AQVA È CLIVO
 PAVLV M EDITIORE-




NOVA ORGANI MUSICI FORMA, CUIUS FIDES METALLICÆ, DIGITIS, ET
 PLECTRO PULSATÆ, CONCENTVM EDVNT VARIVM ETIVC VNDVM, MODIS
 TEMPERATVM PARI BVVS, QVIBVS LYRÆ ET BVCCINÆ SONI QVODAM MODO
 REFVRVNTVR.




ARTIFICIUM NVNQVAM VISVM, QVO PARVA HOMINVM MANV, TRANSVE-
 HANTVR È LAPIDICINIS COLVMNARVM ET OBELISCORVM MOLES, AD
 REGIORVM ÆDIFICIORVM CVM VENVS TATEM TVM PERPETVITATEM-



MACHINA NOVA AD TOILLENDA IN CARROS ET VEHENDA
 INGENTIA ONERA, PER LOCA PERVIA, IDQUE SINON PLANÈ
 EA CELERITATE, QVA VVLGO FIERI SOLET, SALTEM MINORE
 SVMP TV ET OPERA, CVM EQVORVM, TVM HOMINVM.




ARTIFICII GENVS EXPORTANDIS MERCIBVS NAVIGIIS QVE TRAHENDIS ADVERSO
FLVMINE APTVM NVLLO FLANTE VENTO PAVCIORIBVS EQVIS AC MINORE SVMPTV
QVAM VVLGO SOLET



ARTIFICIVM NON VVLGARĒ TERRĒ MIRO COMPENDIO ARANDĀ, TRIPLICI VOMERE
SIMVL, GEMINIS FVNIBVS AD PLAVSTRVM ARATRĪ ALLIGATIS, ET VEL SVPRĀ
PLAVSTRVM, VEL IN FINIBVS ARVI SESE VICISSIM EXPLICANTIBVS, ET COM-
PLICANTIBVS.




34
ARTIFICIUM NOVVM AC COMPENDIOSVM, IN QVO ROTA AD EASDEM PARTES
CONVERSA, VLTRO CITROQUE TRABEM DVCIT ET REDVCIT, VT TELA
ELABORETVR AD INSTAR VNDVLATI SERICI-




NOVVM MACHINÆ GENVS QVA SINE VLLA SCANSILI
 FABRICA CÆMENTA PROMPTÈ VEL PLVRIMIS
 STRVCTORIBVS MINISTRANTVR STRVENDO VEL
 REFICIENDO MVRO VALDE NECESSARIO




MACHINÆ NOVÆ RATIO, QVA APPVLSIS AD PORTVM
CYMBIS, AQVA VEL ALIA QVAVIS RE COMPLETIS
ET ONVS ITS, HIS PARVO NEGOCIO EXONERENTVR-




NOVA INSTRUMENTI COMPOSITIO, AD EXONE-
 RANDA MIRO COMPENDIO MAIORA NAVIGIA
 PONDERIBVS, ET MOLIBVS QVAM TVMVIS
 VASTIS ONVSTA, COCHLEA ET TRVTINÆ
 MINISTERIO-




FORMA NOVÆ MACHINÆ, AD EXONERANDAS, QVASVIS
 NAVES, AD PORTVM APPVL SAS, COLVMNARVM, AVT
 ALIARVM EIVSMODI RERVVM PONDERIBVS IMPEDITAS



MACHINA NOVA EGERENDÆ TERRÆ E FOSSA
 EXIGVO SVMP TV ET OPERARVM NVMERO ET EX
 EA TERRA DVCENDO VALLO INTRA MVROS APTA




ARTIFICIUM AB AVTHORE INVENTVM, AD DIMOVENDAM A
RECTO SITV, ET ALLINC QVOVIS TRA²N²VEHENDAM, CVM
TVTISSIMÉ, TVM MINIMO SVMPV, AC RVRSVS ERIGENDAM
IN LOCO FIRMO QVANVIS INGEN-
TEM COLVMNAM AVT OBELISCVM





NOVVM ET CERTVM INVENTVM, CONSTRVENDIS 4
LOCO QVAMVIS HVMILI CAMINIS, A QVIBVS ET
SOLIS RADII, ET VENTQRVM FLATVS, ITA ARGENTVR,
VT IN CVBICVLIS, FVMO, NVLLVS OFFENDATVR-




NOVVM PVLPI TI GENVS, IN QVO DVOBVS ADVERSIS, ET
 APTATIS SPECVLIS, LITERARVM FORMÆ REFLEXÆ, AC
 AVCTÆ EXALTERO, LECTI ONEM REDDVNT MAGIS
 EXPEDITAM, MINVS QVE HEBETATVR OCVLORVM ACIES-






Faint, illegible vertical text or markings on the right side of the page.


RECENS INVENTVM HAVD ASPERNANDVM, QVO
 PRÆALTI PVTEI AQVA, ASQVE TVBIS ET SPIRACV
 LIS, ITA POTEST EXHAVRIRI, VNA ET ALTERA
 TROCHLEA, VT PONDERIS TANTVM MODO DIMIDIVM
 PERSENTIAT IS, QVI IVGV M AGIT-




ALTERA AD EANDEM REM INVENTA FABRICA, QVA
SINE INTERMISSIONE, AQVA È QVOVIS PVTEO SVRSVM
EDVCITVR, ETIAM SINE TVBIS, ET VALVVLIS, ID QVE
ALTERNO ET LIBRATO TRVTINÆ MOTV-



RECENS MACHINAMENTI GENVS, QVO TVTO VNI
AVT PLVRIBVS LICEAT, TVM DESCENDERE,
TVM ASCENDERE IN FODINA.M, QVANTVMVIS
DEPRESSAM, ATQVE INDE EXTRAHERE
METALLICA EFFOSSA-




NOVVM EX TRVTINA ORGANVM, QVO FLVENS
AQVA, AD CERTAM TOLLITVR ALTITVDINEM,
TERRAMQVE RIGANDAM INVNDAT, ROTA INTERIM
INTRA AQVAM ABDITA, NE ÆSTV FATISCAT-




47



HAC NOVA ET DURABILI MACHINA, TVBI
 RATIONE, ET VALVVLARVM INTERNÈ AD TVBI
 CAPVT ADIVNCTARVM, AQVA EX PYTEO FACILE
 EXHAVRITVR, ATTRACTIONE ET IMPVLSIONE
 SIMVL, AGENTE TRVTINA-




HEC NOVA MACHINATIO OSTENDIT QVA INDVSTRIA,
TVBO, VALVVLÆ VT ALIBI ADDITÆ, AQVA PER FLVENS
SE SE, EX LOCO DEPRESSO, POTEST ETIAM TRAHENDO
ET COMPELLENDO, AD TVRRIS ALTITVDINEM EDVCERE
EX ARTIFICIO VECTIS-



49
 ALIA RVRSVM, AC FIRMA HYDRAVLI FORMA,
 QVA, RATIONE VECTIS, ET ÆQVIPONDII, AQVA
 TRAHENDO ET TRVDENDO, CVM VALVVLARVM
 ARTIFICIO, TÀM ALTE PERDV CITVR, VT MANVA
 LI OPERA, ALTIVS DVCI NEQVEAT-



MACHINAMENTI NOVA COMPOSITIO, IN QVA
ROTA, TELIS INSTRVCTA, ET VENTORVM VNDIQVE
PER FLANTIVM IMPVLSV ACTA, SVB TESTVDINE
TVRRIS, AQVA EX IMO LOCO IN SVMMAM ALTITV-
DINEM EXTRAHITVR-




FONS AEOLICVS PERENNIS CVM MVSICO CONCE
NTV ET MOTV CALESTI AMBOBVŚ QVOQVE PERE
NNIBVS QVALESCVNQVE APPLICARE LIBVERIT







MACHINAMENTVM VT NON VVLGARE, SICVT OPINAMVR
 ITA SINGVLARE IN EIACVLANDA AQUA, ADVERSVS
 INCENDIA: MAXIMÈ CVM FLAMMA SVPERANTE, NVLLI
 PROPIVS AD ÆDES PATET ADITVS-




ARTIFICIUM NON CONTEMNENDVM, QVO CYMBA CVM
 MERCIBVS IN PORTV DEPRESSA, NON MODO MERCES,
 SED IPSVM QVOQVE NAVIGIVM, VEL INTEGRVM,
 VEL DISCERPTVM, EXTRAHI QVEAT VT EO IMPEDI
 MENTO PORTVS LIBERETVR-




MACHINÆ GENVS HAVD DISSIMILE EI QVOD OLIM
 SYRACVSIS EXHIBVIT ARCHIMEDES, CVM OPERA TRIS-
 PASTI, ET VNICA MANV È TERRA IN MARE, INGENTI MA-
 GNITVDINE NAVIM DEDVXIT: SPECTANTE REGE HIERO-
 NE, CVM PLEBE INFINITA, QVÆ OMNIBVS VIRIBVS CON-
 IUNCTIS, IDEM NEQVIVIT EFFICERE-






THE UNIVERSITY OF CHICAGO
LIBRARY
JAN 10 1900
CHICAGO, ILL.


ARTIFICIVM HACTENVS INCOMPERTVM, QVO TRIPASTI AVXILIO,
 PARVO OPERARVM LABORE, NAVIGIA HAUD PLANÈ VASTA, IN
 LITTVS SVBDVCVNTVR, VT REFICIANTVR-




MACHINÆ HACTENVS IGNOTÆ CONSTRUCTIO, QVÆ TRVTINÆ RATIONE
 NAVIS OMNIBVS SVIS ARMAMENTIS INSTRVCTA, SOLA MANV IN ALTVM
 TOLLI, FT IN PORTVM DEDVCI, VEL EX PORTV EDVCI POTEST-



ARTIFICIVM NONDV M VVLGATVM COLLOCATVM IN
SENTINA NAVIS, QVA ADMITTITVR AQVA MARIS,
QVA MOTV NAVIS AGITATA, ROTIS IMPVLSIS
ET LIBRATIS, ITINERIS CONFECTI SPACIVM
EXACTE DEFINIT.



NOVVM ARTIFICIVM EXTRAHENDÆ È PROFVNDO MARIS, NAVIS ONERARIÆ SVBMERSÆ, SI 58
MODO AQVAVM MLTITVDO NON EXCEDAT TRIGINTA VLNAS, AVT NISI NAVIS NIMIA
MOLE LIMI, VEL ARENÆ, OBREVTA, AVT PENITVS CONFRACTA SIT.



59

H^AEC TANDEM NOVI PRELI ET ANGVSTI SPECIEM
 EXIBEMVS, TRIBVS CONSTANTEM COCHLEIS, QVA
 VSVI FVTVRA EST VINDEMIÆ, ET PANNIS PRE
 MENDIS. ITEM GEOGRAPHICIS CHARTIS EXCVDENDIS,
 IMPRIMENDISQVE TAPETIIS, SVBIECTO CORIO,
 VEL TELA-



INVENTVM VIX CREDIBILE QVO TRVTINÆ, ET MOTV LEVIS PRETER NATVRAM
 RATIONE, NAVIGIVM ITA CONSTRVITVR, VT TRANQVILLO MARI IPSVM
 PROMOVEAT, ET REMISSO VENTO CVRSVM ACCELERET, AVT NIMIO TEMPE-
 RET. RES VTIQVE DIGNA REGIS NOTITIA-



De la Cour
George De la Cour



